

9









Trismegistus Mediceus,
S I V E
LEO X. R. O. M.

*tribus Crationibus in anniuersario
triennij funere laudatus :*

A B

IACOBO ALBANO GHIBBESIO,
MED: DOCT.

atquè in Romana Sapiencia
Eloq: Prof.



R O M A E,
Typis Dragondellianis, M. DC. LXI.

SVPERIORVM PERMISSV.

Imprimatur,

*Si videbitur Reuerendiss. Patr. Mag. Sac. Pal.
Apostolici .*

O. Archiep. Patrac. Vicesg.

Imprimatur,

*Fr. Seraphinus Bertollinus Magister, & Socius
Reuerendiss. P. Fr. Raimundi Capisucci, Sacri
Palatij Apostolici Magistri, Ord. Præd.*



AD SERENISSIMUM
PRINCIPEM,
FERDINANDVM II.
MAGNUM HETRVRIAE
DVCEM.



LEONEM Decimum;
Pont. Max. Laurentij ata-
ui tui æmulum filium,
MAGNANIME FERDINAN-
DE, orbis ipsum Chri-
stiani deindè patrem sanctissimum atq;
optimum, qui gentem Mediceam in

hanc tantam, quam iustâ religione colimus, nec sine admiratione intuemur, augustæ dignitatis magnitudinem ac nominis felici virtute prouexit, Tibi ego potissimum, hæredi atquè amplificatori gloriæ tam illustris, exiguâ istâ trium Laudationum tabellâ repræsentare decreui. Fuere hæ Romana in vrbe, cœlestis illius præfecturæ imperij folio ac sede, non inuitâ Mineruâ, vt opinor, à me conceptæ, mōx etiam in Lyceo extructo ab eodem planè regificè, per triennium anniuersarij recurrentis funeris continuum suam frequentiam desiderioq; Quiritium & aduenarum omnis generis recitatæ. Ac primas quidem conciones duas dedicaui sigillatim rotidem è sacro Patrum purpuratorum Collegio delectis viris, Bernardino Spadæ ac Sfortiæ Pallauicino, propter quādam cum LEONE vel naturæ conuenienti-

entiam, vel similitudinem studiorum (quid enim poterat fieri melius?) iam cum accessit ad eas tertia, cui numero Magi semper AEgyptij perfectionis summam induxerunt, non amplius singulis singulas hominibus offerre, sed omnes alicui Geryoni, qui trium veluti cordium particeps foret, hoc est, usquequaq; putaretur absolutus, certum erat addicere.

Ecquis autem, nisi è MEDICIS quispiam, ut carmen Homericum vaticinij obtineret locum, supplere multos posset vnus? Tu enim uero supra ceteros ut regni authoritate longè princeps, ita ductu ac iure clarissimæ familiæ, gentili adeò possessione virtutis πολλῶν ἀντιπάρξας ἄλλων eminebas. Quantum, Deus bone, instar in te! seu veriùs, quantus excessus auitæ laudis! Quæ decora summos viros maiores tuos, quæ orna-

menta principes exteros vllâ memoriâ
 vel atate beatos atq; spectabiles etiam
 diuisa reddidêre, Cosmum illum Ma-
 gnum, patrem patriæ cognominatum,
 claritatis Solem vestræ, prudentia, do-
 ctrina Laurentium, LEONEM magni-
 tudo animi, moderatio Clementem,
 tùm Aristidem iustitia, grauitas Lycur-
 gum, vtrumq; fortitudo Macedonem,
 constantia Pompeium, fortuna Cæsa-
 rem, affabilitas Titum, hæc Tu colle-
 cta generosissimo pectore, quasi Deo-
 rum Pandoræ pyxide inclusa dona, te-
 nes mirabiliter.

Cùm eiusmodi Te virtutibus exi-
 miis, ac planè regijs illustrem venera-
 mur, tùm nullam interim humanarum
 artium partem negligere, manu etiam
 admotâ persæpè, suspicimus. Amas
 eos laudasquè (nè rerum opifices hu-
 miliorum percenseam) qui tenent cum

Or-

NVNCVPATORIA: 3

Orpheo plectrum, cum Graccho fistulam, cum Archimede radium, cum Vitruvio perpêdiculum; qui exquirunt tempora cum Thalete, numeros cum Chrysippo, mensuras cum Euclide, atomos & mundos cum Democrito. Vndè mihi firma spes affulsit, si quicquid hoc est opusculi, pignus quidem certè (quale id cunq; est) officiosi obsequij, quod iampridè debeo; sub tutelâ tui nominis ederetur, promptum cum dextrâ patrocinium inueniendi.

Sed næ ego rhetor importunus, tibi què meritò grauis & ominosus videri possim, qui alienissimo tempore gaudia tua duplicem ob prolem cumulata domestici luctûs recordatione funestè. Quid enim habet commune cum inuente vitâ, quam in suscepto nuper filio post duodeviginti annorum tarditatem gratulari potiùs oportebat, na-

turæ finis? quid cum lætissimo coniugio alterius filij, pleni iuuenis maiestate, non Hæredis Hetruriæ magis, quàm vultus & ingenij tui, cum regali virgine Borboniæ stirpis contracto, dissolutio per mortem societatis omnis? Scitum est vetus illud, Seruiendum scenę. Nec oraculū profectò Appollinis, Nosce teipsum, plus complecti videtur, quàm Nosce tempus, præceptum Sapientis. At nunc tot causas hilaritatis vel minimâ doloris aspergi gutta nemo prudens iudicabit non rationi dissentaneum. Certè: qui non idem ratiocinari perindè voiet, vt ego ipse hoc offerens munus, iudicio sapientissimorum hominum doctus, intelligo. Nègo primum præclaros viros mori vnquàm; sed vitam permutare. Nomen tantum habet mortis illorum occasus, qui statim resurgunt ad immortalitatem. Quid ergò?

ergò ? neq; oratio igitur in laudem Herois alicuius vitâ functi lugubris duci debet , sed præconium . Hîc de ipso commemorantur omnia , quęcunq; de viuo prædicabantur . Ecquidnam verò à lamentatione potest abesse longiùs gloriosè factorum dictorumquè acroamate suauis & canoro ?

Quocircà illud mihi potiùs elaborandum videtur , mei consilij rationem in dedicando , quam non iniuriâ fortassis ambitiosi animi nimiam fiduciam , quis vocauerit , aut inconsiderati temeritatem , vt approbem Tibi . Multę me ad id grauesq; causę compulerunt tum communes , tum priuatę ; quas tamen , nè sim longior , ad duo capita reuocabo ; amorem in populares meos perpetuum tuum , & serenis illis temporibus , & hisce vltimis turbatę Britannię procellis demonstratum , quibus Tu cunctis

Etis Hetruriam , paulò etiam honestioribus Regiam tuam, iucundissimum vel secessum vel perfugium esse voluisti; deindè honorem mihi ipsi (quod erat alterum caput) à Duce Francisco Mutinam euocato filij erudiendi gratiâ (heu! Almerici acerbæ memorię) singulari quodam modo , dùm illac transirem , nil tale merenti habitum. Pròh Superi! quæ admissiōis facilitas iterùm ac sæpiùs ad præsentiam ! admissio quanta, sermonis declarata comitas! quàm liberalis officiorum recedenti pollicitatio ! De quibus rebus quotiès cogito, cogito autem sæpissimè , toties Tibi , quod Tacito plaudì solitum accepimus præstantissimo imperatori , venit in mentem acclamare ; Quis meliùs imperat , quàm literatus ? Sed istam gratiam non meritorum meorum , vt dixi , verùm literarum Cardinalis Spadæ , peraman-

tis

tis patroni mei, cenſeo commendationi magnâ ex parte referendâ. Quanquàm mihi (abſit verbo arrogantia) non nihil etiam, vt doctrinarum ſectatori, pro eximiâ tuâ, quâ ferris in id genus homines, voluntate, licèt veniſſem vacuus, poteram ipſe, opinor, de Te promittere.

Vtùt ſe res habet, huic Academię ſaltem gratulor Romanę Sapientię, in quâ perſonam, àn numerum facio aliquem, quòd ſtudiij annui ſui Iuſta LEO- NI Pontifici Maximo ſummâ ſacrorum celebritate perſoluēdi, teſtificationemq; grati animi propter ingentia beneficia authori optimo nunquàm intermiſſâ laudatione,

*Ex quo reliquias, diuiniq; oſſa Parentis
Condidimus terra —*

luculenter oſtendendi, Te, DVX INCLYTE, perquàm munificum ex eadem
pro-

profapia lógo interuallo naſta ſit adiu-
torem. Nam ſicùt immortalia tanti Pa-
trui promerita ſemper in oculis geri-
mus, & quaſi comprehenſa manibus
tenemus, ità recordatione diuinę vir-
tutis cum ſumma liberalitate coniun-
ctę, quam hęres adiſti, illum nos ad-
huc in Te ſuperſtitem ac viuum intueri
credimus. Quemadmodum igitur exi-
ſtis ei cętera ſimillimus, non commit-
tes, vt in hac parte foetum quantulicunq;
ingenij benignè accipiendi defeciſſe vi-
dearis. Habe munus, obſeruantię tef-
feram in Te meæ, vt à Sapientię ſchola,
non indignum; vt à cliente olim ho-
diequè tuo, periucundum; vt à præcel-
ſę dignitati tuę deuotiſſimo, officij
plenum; vt à gentilis LEONIS tui de-
bitore, Tibi deuinctum penitus & ob-
ſtrictum. Deus Te tali mente, qualem
concepimus, erga rei quà publicę, quà
lite-

literariæ commoda diu florentem atq;
incolumem conferuet.

Romæ, Ex ædib. Eminentiss. Card.
Bern: Spadæ. Kal. Mart. M. DC. LXI.

CELSITVDINIS TVÆ

Cultor humillimus


I. A. Ghibbescius

PAV

PAVLVS IOVIVS

in Vit. Viror. illustr.

LEONIS DECIMI virtus haud
dubiè ad salutem humani gene-
ris *Auream atatem* condiderat :
cùm nos statim ab optimi Principis exce-
ssu verè *ferream* pateremur : adeò vt , cùm
fatali errori nostro barbara vis cedes, cru-
ciatus , pestilentiam , famem , vastitatem,
& dira malorum omnium incommoda
nobis attulisset ; literæ inprimis eximiaeque
artes , & rerum omnium copia , commu-
nis item salus , & publica hilaritas , & de-
niquè bona omnia tanquàm eodem sepul-
chro cum *Leone* condita lugerentur .



ARISTOT. l. 4. Ethic. c. 3.

Quoniam *maximis* honoribus MAGNA-
NIMVS dignus est , idem *Optimus*
fit necesse est .


PVA



ILLVS

ILLVSTRISS: ET EXCELLENTISS: ¹³

DOMINO,
CAROLO RINVCCINO,
MARCHIONI BASILICAE,
Magni Ducis Etruriæ ad Summum
Pontificem oratori,
IAC. ALB. GHIBBESIVS, M. D.
rem benè gerere.

UPERIORIBVS diebus, cùm in con-
cionem ascendissem, vt illum Atlantem
cæli, LEONEM DECIMVM, præcla-
rum ciuem vestrum, orbisq; principem,
in maxima celebritate omnis generis hominum pro
more laudarem, oranti tu mihi, Sapientissime
Legate RINVCCINE, quò pompa funebris ab-
solutior euaderet, accessu tuo coronam & pondus
addidisti. Testificari maximè potes vnus populi con-
tinuum desiderium, itemq; syncerum amorem meum.
Vellem vtriusq; partis studium, ad quem spectat
(opinor) præcipuè, facultatum & virtutis tanti
Herois heredi FERDINANDO, pro rei digni-
tate notum esset. Næ ille huiusmodi domestica
gloriæ optatissimo accepto nuncio gaudium gauderet
immortale. Quid oratio, si ad aures ipsa perueni-
ret?

14
ret? quid si non unius anni officium, sed compituum hoc statum & solenne monstraretur?

At non cuilibet, ut scis, Corinthum adire concessum est, nec verò sacra manibus illotis tractare decet. Per Virtutis adem ad templum Honoris olim patebat ingressus. Ut igitur qui Solem intueri volunt, cum in eum oculos intendere propter imbecillitatem nequeant, speciem illius in aqua vel nube contemplari satis habent; sic cum Etruriæ mihi Serenissimus Dux adeundus esset, neq; tantæ splendorem maiestatis sustinerem, ad te modificatam, ut ita loquar, eius imaginem; cuius hac in Urbe, totius orbis regia, luculenter sane personam apud Pontificem Maximum representas, illicò respexi. Quid quòd à Persis institutum cum religiosè, tam providè fuisse accepimus, nè priuatus homo ullus sacrosanctæ regum suorum præsentie atq; aspectui sisteret sese, quem non ex interiori amicorum cohorte aliquis commendasset.

His de causis factum est, præpotenti Principi, eidemquè pererudito, voluminis oratorij quaecunque munusculum impertiri cupiens, Te ut ego potissimum censuerim compellandum, qui & plurimum posses, virtutis merito singularis tuæ, nec velles non aliquid, pro blanda illa in literatos voluntate. Itaque facies ex ingenita naturæ consuetudine benemerendi, quod & opto & auguror, uti Libellus iste, quem alioqui non ingratum confidebam fore, sit etiam tantæ commendationis accessione iucundus.

V A L E .

In

In anniuersario die
LEONIS X. P. M.

almæ Vrbis Gymnasij reſtitutoris,

LAUDATIO

Iacobi Albani Ghibbeſij ;

DICTA

*In Sacello eiufdem Gymnasij 9. Kal.
 Mart. 1659. inter honorarias op-
 timi Parentis exequias ;*

ORATIO I.

*AD BERNARDINVM
 CARD: SPADAM.*



REGVM humandoram, aut
 alio modo clarorum virorum,
 is ritus vigeſcit apud Scythas,
 vt impositum plaustro cada-
 uer circumferretur per om-
 nes vrbes ; cuius particulam erat vnicui-
 que licitum decerpere, siue in arcâ reue-

B

ren-

reuter afferuandam vnguentis delibutam,
siuè protinùs, quod multò putabatur reli-
giosius, imum in ventrem deglutiendam.
Volo equidem ad exemplum huius gentis
quamuis barbaræ (quid tùm indè ? rudes
enim homines & inculti, sicuti libri inele-
gantes & fatui, documenta sæpè multa
continent nostris vsibus pernecessaria, at-
què imitatione dignissima) non corpus in-
clyti Principis, quem laudamus, offerre
vobis, AVDITORES, dilaniandum, quod
foret impium; cui terram extincto leuem
potiùs, quæ est vestra humanitas, longamq;
quæietem precamini: sed spiritum, sed ani-
mum eius ingentem, sed illam diuinæ par-
tem auræ, ferculo quodam imaginario, elo-
quentiæ quadrigis infidentem, perquæ stu-
dia populorum vehentem traducere, vnde
sibi quisque virtutis alicuius præcipuè
adamatæ arripiat monumentum; minimè
colendum extrinsecùs illud quidem & in
speciem, verùm animis penitus vestris,
mentibusquè cõmendandum. Quod mihi
sanè facere cogitanti, suisquè coloribus,
vt dicitur, repræsentare instituenti, subit
opportunè, atque obuersatur ante oculos

certæ

certæ Monetæ impressa facies, quam Seueri Cæsaris tempore scribit Trebellius repertam fuisse, Heroisquè nomine in ambitu percussæ nuncupatam. Erat autem nummi figura intra orbem mirabilis. Extabat inprimis caput elephantis; adscripta vox interpretis, magnanimitas. Tum delphini pectus; index, humanitas. Deindè manus castoris; gratificatio, sententia. Postremò pedes vrsi; subiecta notio, modestia. Vt ex alienis hisce partibus monstrosum profectò animal conflaretur:

Non aliâ formâ rectius nequè Heròæ, nequè virtutes eiusdem exprimere ingeniosus artifex potuisset: cùm iam indè ab aureo seculo, quo istiusmodi hominum coeleste genus viuere desijt, occurrere heròi, sit portenti instar omnium opinione, cygnoquè nigro simillimum. Sed ille tamen ex ijs vnus, quibus comminiscendi quidlibet & audendi semper fuit æqua licentia, nec negatum, si furor incidit,

Delphinum syluis appingere, fluctibus aprum;
fictâ hac excogitataq; dissimilium rerum
compactione, viri dotes excellentis egregiè proposuit; quarum ornatu, qui cæteris

est præstiturus, vitam excolere & cōmendare debet, vt iucundissimam sui memoriam nominis posteritati propaget infinitæ. Non tam Daricus Hytaspis, aut Philippæus Amyntæ loquitur filios, quàm Heros iste nummus Laurentij Medicei, Heruscorum optimatis, **LEONEM**, Pontificem Romanorum. Ità singula illa primæ laudis insignia complexus est digna imperio, atquè ornamenta virtutis! Quamquam mihi nimium restricta videntur ea quidem, angustiora què multò, quàm quæ Leonis pectus impleuerint. Semones designent symbola quatuor scilicèt, quos ob exiguitatem meritorum non omninò censuit cœlo dignos antiquitas; at verò Indigetes, ollos, inquam, maiorum gentium (nàm in rebus sacris priscae loquendæ formulæ insisto libens) quos benefacta in Superum coetum haud numero cōprehensibilia vocârint, nulla satis Ægyptus, emblematum inuentrix, pro eo ac merentur, expresserit. Hos inter Semideorum apices singulariter eminet noster **LEO**, totoquè tantum vertice suprâ est, quantum mortales omnes anteibat in terris dignitate.

Quid

Quid enim? Virtutum quaternis duntaxat gradibus cœlum ascendisse dicemus eum, cui tot quotidie in altissimum seu Capitolij, seu Vaticani solium procedenti subiiciebantur maiestatis? Apagetè cum vulgari communiquè laude, cum de Leone agitur: omnia rara, omnia eximia, omnia ampla & exaggerata debentur ipsi.

Vbi mens, vbi honor, vbi pietas, vbi religio, vbi fides, vbi pax, vbi salus, vbi concordia, iustitia, fortitudo, libertas, liberalitas, felicitas? vbi continentia rebus in secundis, vbi tolerantia in aduersis; in aggrediendo consilium, iudicium in agendo, prodigium in perficiendo? vbi amor patriæ, ciuium charitas subiectorum, bonis præmium constitutum, improbis supplicium, accessus facilis, comis audientia, sermo clemens, summæ demissio potestatis? artium comprehensio & scientiarum incredibilis, Musices in primis atquè Poëtices, quæ affectionum interiorum harmoniam facile diuinam ostenderent: tum verò mira vis eloquentiæ, ac reconditæ non solum eruditionis possessio, sed etiàm fitis? Quid commemorem eius in colen-

dis amplificandisque hominibus; qui hæc
profiterentur, liberale patrociniū, ac
splendidissimam clientelam. Nunquā
fit finis, Auditores, si decorum lumina,
quæ circumsteterunt tantum Principem,
atque illustrarunt, velim singula persequi
nominatim. Pyramides mediū fidiū,
colossi, metæ nobis, quotquot extitē,
opus sunt. Horus Apollo characteres aut
figuras rebus pares præclare gestis nē ipse
quidem adumbrandis in vnâ Memphi re-
periet. Gentes hūc ac nationes concur-
rant oportet vniuersæ: & quicquid in pa-
rietibus vermiculatum, in pavimentis tes-
sellatum, in lignis segmentatum, in vasis
incrūstatum, cælatum in clypeis, contex-
tum in vexillis, exsculptum in annulis,
videre licuit apud quamque vllō tempore
mirabile & elegans, ad elogiū mysterium
conferant sempiterni. Hīc Persarum aquilæ
auræ, noctuæ Atheniensium, Thebanorum
Sphinges effabuntur egregiè. Augu-
sti papilio vnâ cum fluuiatili cancro, quid
sibi velit, intelligitur. Edet vocem, con-
tra domini institutum, rana Seriphia Mæ-
cenatis. Columnæ demū Herculeæ (vt
hos

hos terminos exornationi constituam) à Quinto Carolo vsurpatæ, non ampliùs claudi Oceanum, sed patere adhuc, vltraquè iri posse, testes erunt:

Cæterùm nè venditatio ista præconiorum videatur ex oratorio myrothecio potiùs, quàm ex gestarum veritate rerum, esse profecta, aggrediar ex his, quæ perstrinxi, nonnulla deducere cumulatiùs, rebusquè ipsis allatis in medium orationi fidem adstruere. At quoniàm virtutum illustrem coronam, quâ Leonem non tam ambiri dicebamus, quàm redimiri, minimè licet per angustias temporis numerando commonstrare, quòd & putidum esset, vt in re notâ, insistere in singulis, vobisquè recognoscere minutiùs afferret molestiâ: vt breuitati pariter atquè patientiæ consulam vestræ, ad quatuor capita numismatis Heròi denotando præsignati, reliquas virtutes, tanquàm membra quædam siuè partes, more Dialecticorum, qui vni generi subiiciunt plures species, reuocabo. Quinimò agam adhuc etiam strictiùs: illa ipsa prima scilicèt, humanitatem, gratificationem, modestiam, magis principali adscri-

B 4 bam



bam origini, ac veluti riuulos à qualitate Leonis accersam propriâ, magnanimitate. Quod & ipse meo quidem iudicio innuere voluit non obscure, dùm subito Pontifex creatus LEONIS nomen, cùm Ioannes prius vocaretur, assumpsit: vtpotè qui cùm propter insitam excelso regioquè animo clementiæ indolem, tùm assiduam rerum appetentiam maximarum, tùm cogitationem gloriæ haud vulgarem acta per grandia comparandæ, non expresso quidem titulo, veruntamen eruditâ allusione, MAGNANIMI cognomen affectaret. Hoc à generosissimo animalium placuit mutuari nimirum, quod duo Pontifices, eius proximi decessores, in hominum clarissimis præstantissimisquè fecerant antè, quibus Alexandri atquè Iulij augustissimæ appellationes arrisissent.

Subest enim cuiusque rationi nominis latens quædam ac diuina vis in vtramque partem, vt quos pulchrum aut turpe insigniuit, eos ferè nescio quo pacto consimiles reddat sibi. Nùm quia huiusmodi vocibus, quæ sunt rerum notæ ac magistræ, puerorum aures vsquè personant;

quæ

quæ autem hausimus à teneris annis altius hærent atquæ infiguntur ? Vt enim exēpla fileam in eo genere propemodum infinita, quibus ætates & libri omnes sunt referti, pauca mecum hîc aliquot licet degustetis. Quid Pyrro ardentius, Aquilâ perspicacius, iuris & æqui Iustiniano studiosius, Ambrosio dulcius, Laurentio inuictius ? Agnete, Catharinâ, Sophroniâ, (stat & fæminarum instructa acies) quid castius, purius, temperantius ? contraquæ, foedius quid Turpilio, procacius Boccatio, vno Bibulo Furio vel plagiarium magis vel temulentius, spurcius deniquæ Verre, illo Siciliæ infami Prætore, vt etiam pecudem omni luti labe eam ipsam superaret ; quid Verre, inquam, putrius existimari aut sordidius vnquam potuit ? Hinc enimuerò præclarè Plato, sicuti cætera omnia, in dialogo, opinor, de Sapientiâ, vult ac iubet, speciosum infantibus nomen poni. Atquæ Athenienses nihilo sequiûs, quorum semper fuit prudens syncerumquæ iudicium, nomina iuuenum fortissimorum, Harmodij & Aristogitonis, qui libertatis recuperandæ gratiâ sub tyrannis Hippiam
inter-

præstans facinus, aut actionem eximiam;
 nulla promerita, à primo ortu ad tantam
 amplitudinem interiecta, quibus tanquàm
 gradibus ascendit ad summum imperium,
 nec dum attingi? Poteram profectò, ac sanè
 debueram, illius maiorum præferre ima-
 gines, ad memoriam domestici splendo-
 ris & declarandam nobilitatem; Cosmi
 potissimum, patriæ patris salutati, proavi,
 atquè Laurentij genitoris, viri cum in suâ
 Rep. principis, tum togato castrensi què
 consilio admirandi: poteram affinitates
 cum potentissimis regibus loqui contra-
 ctas: poteram Claricis Vrsinæ, antiquis-
 simæ stirpis foeminæ, eiusdem matris, vi-
 sum narrare nocturnum; veluti quomodò
 prægnans Leonem, ingentis magnitudinis
 & miræ lenitatis belluam, in templo Flo-
 rentiæ omnium maximo somniârit se de-
 ponere absque gemitu: quò constet vide-
 licèt hoc in partu cœlum ipsum suas egis-
 se partes, ut qualis esset aliquandò vir fu-
 turus tali prodigio tantò antè præmonstra-
 ret. Tum de infante in lucem edito, qui
 dies incidit in ante diem III. Id. Decembr.
 anno reparatę salutis supra mille quadrin-
 gen-

gentos quinto & septuagesimo, à prætextâ & bullâ aureâ vsquè eò, quoad virilem togam sumeret, Deus immortalis ! quàm latus patet laudum campus, in quo excurrere liberè, sequè iactare magnificè potuisset oratio ! Quot res & quâtas de summâ in puero spe, summâ ingenij indole, summaquè virtute prædicassèm ! quid de bonis moribus, deque optimis disciplinis, quibus patris sui, doctissimi & grauissimi ciuis, curâ id ætatis ornatus fuerat, & instructus, non dixissem ! musicis numeris præcipuè, & vocibus, & modis, at multò maximè Latinâ Grecaquè literaturâ, sub præceptoribus Angelo Politiano & Bernardo Michelotio edoctus, eruditionis tunc famâ clarissimis. His initijs, ac fundamentis moles illicò honorum tam immensâ, quotidie magis congestorum excitata surrexit. Nam quid, obsecro, putatis accidisse ? nouum, Auditores, non modò inusitatum, verùm prorsus admirabile, & in omni memoriâ inauditum. Vt perampli duo Principes, iudicio & imperij gloriâ excellentes, regnorum interuallo disiectissimi, certatim tamen ad puerulum vl-

tra annos honestandum, alter altero munificentius, ità pronis studijs conuenirent. Ludouicus quidem, Rex Gallia huius nominis Vndecimus, cum vix decennem insigni Sacrorum Antistitis præfecturâ, optimoque censu donauit. Innocentius verò Octauus, Pontif. Max. tribus post annis longè ampliori religionis loco ac munere non donauit solum, in Collegium eundem Purpuratorum suorum coöptans, sed Legationis insuper Hetruria totius prærogatiuâ, deincepsquè Patrimonij D. Petri, Perusia, atquè Bononia administratione cumulauit.

Primum vitæ actum, quod humanæ tyrociniū ætatis rectè quis vocauerit, euoluimus; iam ad illa, quæ perfecit adultior suapte sponte, proprioquè arbitrio, relictus sibi, (nam Laurentius pater hastenùs vixerat, fidus comes, & perpetuò affixus custos) ad illa, inquam, homini propè dicam negata, æternis fastis & annalium monumentis transmittenda, vno verbo Pontificatu maturius, quàm per legem inueteratæ consuetudinis liceret, adipiscendo facta dignissima, procedamus. Etenim

anim triplicem Tiaram, ô miraculum! triginta & octo annos natus iustis comitijs, & plerisque suffragiis conspirantibus, acclamatus Pontifex suscepit. Eo interim, spacio satis explicari nequit, quot indicia fortis & excellentis animi vel vtriusque fortunæ telis eodem semper vultu perfrendis, vel aggerandis & disseminandis beneficijs, ediderit: Ac Petro, germano fratre quidem, quâ vi Caroli VIII. Francorum regis, in Italiam hostiliter ingressi, quâ civili dissensione populorum, à Reip. gubernaculis summoto, & Florentiâ pulso, atquè cum omni Mediccâ familiâ relegato, vulneri locum alicui grauiori adeò non concessit, vt nè leuissimæ quidem stricturæ vestigium vllo tempore appareret. Ictum certè prudenti quadam declinatione, & vt aiunt, corpore effugit. Is quippè, vt seruiret tempori, abscedere item tantisper, & per exteras gentes peregrinari constituit, quòd Romæ cum dignitate manere non poterat, cùm Alexander Pontifex Florentinis tùm fœdere iunctus esset. Redijt ipse haud ità multò post, Alexandro mortuo, licèt Medicei patriâ, & auitâ dominatione-

natione exacti totos decem & octo annos exulâssent. Iulium II. reuersus habuit sibi, ac domui suæ commodiorem: cuius ope & gratiâ Legatus iterum creatus, quam pacem cum Ludouico XII. componere non valebat, ad rem priuatam contulit. Nec exitu id sanè infelici. Expugnato namquè Pontificijs copijs Prato, (vt intelligatur militari etiam gloriâ præstitisse) cùm Florentiam victor tenderet, priusquàm ab aduersarijs præsidia parari opportuna potuissent, à beneuolis & propinquis introductus, totam subitò familiam reuocauit. Ibi Soderino perpetuam Dictaturâ abdicante, Remp. ad arbitrium constituit, fratre Iuliano natu minore, quòd Petrus iam pridem in Campaniâ ad Liris ostium fluctibus obrutus interiisset, principe relicto. Nonnè ista vobis opera videntur admiranda, incredibilia, ac tantùm non diuina? Sexcenta licet eiusmodi proferre alia, quæ consultò prætermitto, velis equisquè properans ad ætatem auream eius felicissimi dominatus.

Hic, Auditores, hîc eloquenti esse licet, non modò diserto, vel infantissimo babilio-

balioni: hîc enimuerò metuendum non erit, nè non suppetat, imò superfluat argumentum; quantumquè dicendo prouehitur oratio versus epilogum, quasi portum subitura, alterum semper tantum in tam vasto rerum præclararum ac memorabilium Oceano enauigandû, plus plusq; porrò emetiendum non videatur superesse. Hâc in luce tandem, quemadmodum Sol, ille mundi iucundissimus oculus, ad regionem sublatus meridianam, clariùs lucet, recreatquè vehementiùs; pari ratione Leo, generis humani iubar vnicum atquè delictum, Sedem Petri perindè atq; celsissimam gloriæ sphaeram assecutus, heroicæ virtutis & liberalitatis radios suæ latè explicuit, longequè iaculatus est.

Sed quoniam, quàm laudare frigidè, tacere est satius; ego, cui certi quidam orandi termini fuêre à Studij nostri moderatoribus circumscripti, nimium sanè breues pro tantâ copiâ encomiorum, quos tamen vereor valdè vt tenuerim, iam transgressus, ea facinora, quæ Leo patrauit Summus Pontifex, differam in aliud tempus à capite creationis arcessenda. Tùm

per

per virtutes eius omnes, quas recensui carptim modò, in suis exaltationibus, vt Astrologi loquuntur, positas, adeoque sese liberrimè exerentes, vagabor eadem licentiâ diffusius. Dicam de pacis publicæ studio primùm ardentissimo, cùm Europam omnem bellicis turbinibus agitatam, remquè sacram Religionis dissidio fatiscētem ac penè dilapsam, excepisset. Dicam de singulari erga Deum & Cœlites pietate, quâ inductus, id agebat, vt Christianos Principes inter se conciliatos aduersus Othomannum impelleret, communem hostem. Dicam de Synodo Lateranensi per Iulium coeptâ contra Pisanum conciliabulum, ab eo continuatâ, faustequè perfectâ. Dicam de Romanæ ditionis pomœrio dilatato. Narrabo, Pontificiæ vt perculerit inimicos authoritatis, infregerit machinatores necis suæ, tyrannos vsquequaquè vel exegerit, vel seuerè punierit, iustos dominos demùm imposuerit. Referam, vnaquè celebrabo, duobus capitalissimis veræ hostibus religionis, tùm Selymo Turcarum Imperatori, qui victis interfectisque Sultanis Syriæ & Ægypti, ea regna am-

plissima occupârat, maximo cum Christianorum omnium, quorum ceruicibus imminebat, terrore; tùm Sectæ non minùs impuræ ac nefandæ conditori dicam, an confarcinatori? Luthero, perditì oris homini, tenebris nescio è quibus popinarum ac lustrorum emerſo, ſi Superis placet, nouo Lycurgo, diuinum cultum, ſacra, & cæremonias veſano mentis impetu proterenti, fœdequè laceranti, quibus armis ierit obuiàm: cœleſtibus nempè, quæ & promouiſſe Deus ab euentu viſus eſt: Supplicationes enim per Vrbem indixit ſolènes Leo: pompam ipſe nudis pedibus à baſilicâ Vaticanâ ad S. Marię ſupra Mineruam inſigni conceptâ pietate proſecutus. Honorem non tacebo nouũ planequè eximium cum cauſâ illius conferendi, Britanniæ meæ ſingulariter impertitum, cùm Henrico Regi cognomentũ Aſſertoris Eccleſiæ, deindè etiam Fidei Deſenſoris nobiliſſimum, ad reliquos tituloſ adieciffet. Quod vtinàm ille, proh dolor pudorquè! quàm mereri, tam nouiſſet conſeruare. Certè quidem nec pœnam ſibi, nec vulnus ſuis, nec miſeriam patriæ tantam in-
flxiſ.

fluxisset. Tum exequar ordine præclaras
 victorias cum propriâ, tum causâ amico-
 rum initas & obtentas; quas inter, Par-
 mam Placentiamquè recepit. Deindè cœ-
 lestis illius potestatis effectus aliquot præ-
 cipuos enumerabo, diplomata, sanctiones,
 indulgentias, concessionem, expiationes,
 ijsquè luculentissimam Francisci Paulensis
 superponam coronæ vice dedicationem.
 Postremo loco, non postremâ tamen æsti-
 matione, mentis extollam dotes acerrimæ,
 præstantisquè notas corporis insigniores;
 quandoquidem pulchro Virtus è corpore
 veniens existat, vt ait ille, gratior multò,
 mirabilesquè amores accendat sui.

Dicam ista (repromitto) hisquè affinia
 conplura alia, cum tempus idoneum na-
 ctus ero: vt ex amissione tanti Principis,
 totq; subtractis ornamentis, vos facilius,
 vos præcipuè (Patres amplissimi, & Do-
 ctiores venerandi) qui adstatis, de graui
 iacturâ vestrâ, deque miserâ orbitate hu-
 iusce Academiæ, non sine luctu, vt facitis,
 iudicare possitis. Habet hîc vnusquisque
 vestrûm, quod propriè doleat, priuatim-
 què conqueratur; facultatis summum co-

lumen atquè præfidiū extinctum singulorum. Quanquàm quodnam mihi excidit indignum profectò ex ore verbum? extinguere nunquàm poterit, qui viuit in memoriâ seculorum sempiternâ: quem suæ naturæ rara priuilegia, quem maxima beneficia dispersa in homines, quem publica opera per pagos & vrbes, tanquàm trophæa gloriæ constituta, proponunt vsquè posteris recentem. Viuit, viuetquè in animis vestris; crescet fama, quamdiū pretium aut honos habebitur Sapientiæ, cui templum Romæ sedemquè pulcherrimam consecrauit; cum flore deniquè iuuentutis, quæ ad Scholas istas in dies singulos ex omni parte confluit, tot quasi ad tabernaculas bonarum Artium, eius immortalis munere excitatas, nomen perpetuò

adolefcet. Facio finem,

Auditores, ac ri-

tuali verbo dimitto omnes in præsentia;

Ilicet: vos valere Herôa, salue-

req; æternum, abituri

jubete.

D I X I:

De

De Laudibus
LEONIS X. P. O. M.

alimi Athenæi Romanæ Academiæ
 beneficentissimi quondam
 Patroni,

CONCIO FVNEBRIS;




HABITA

*ad honorarium Tumulum inter anniuersaria Sacra, in AEdæ Sapientiæ,
 8. Id. Febr. 1660.*

ab Iacobo Albano Ghibbesio.

ORATIO II.

ADSFORTIAM PALLAVICINVM CARDINALEM.




RÆCLARE fanè, ac prudenter, vel, vt ab huius dignitate, loci mutuer verbum, dicamquè significantius, à maioribus nostris diuinâ quadam sapientiâ prouisum est, quem beneuolum in vitâ, prolixūquè

B 3 ipsi

ipsi supra hominē experti cognouissent studiorum & otij sui fautorem & penē parentem, eius vt Principis morte abrepti recurrens memoria, non secūs ac præsētis alicuius numinis, anniuersario sacrificio atq; laudatione, eo ipso in templo quotannis, quod ille Scholis extrui finitimum voluit, à gratā Doctorum posteritate celebraretur. Is est L E O, quod iam profectò me tacente scitis, A U D I T O R E S; istius quidem serie nominis Decimus, cæterum, inter Pontifices, quotquot Maximi recensentur, nulli nequē ingenio, nequē optimis consilijs, nequē religione, nequē liberalitate, nec omninò gestarum gloriā rerum secundus. Ac tantò mihi videtur merclè prouidentia maiorum illustrior, magisque prædicanda, quòd eam ceremoniam ineunte vere statam ac solennem perpetuò esse decreuerunt.

Enimuerò naturam hominis inter & ingenium agrorum mira conuenientia intercedit. Ità nimirum quatuor ætates percurrens, quas viuimus, egregiè physicorum gnarus Hippocrates, totidem illas anni tempestatibus proportionē scripsit respondere.

dere. Sed omiffis alijs breuitatis causâ, ver-
num tempus attendo potiffimùm, vndè in-
stituto fermoni apta, hâc duntaxât in par-
te, reddatur analogia. Nam ficuti nunc
terra nouo Solis accessu tepefacta geniali
& auido gremio sparsum semen excipit,
messẽm postea grandi fœnore paritura; ;
simillimè sanguis vniuscuiusque nostrũm,
totus adeò corporis habitus, ad imitationẽ
Telluris matris, ex intimis penitus me-
dullis atquẽ præcordijs efferuescens bene-
ficiorum recordatione talium ac tãtorum,
vires mentis excitat in cõspectu vel adum-
brati Solis huius Academiæ, ad gratiæ
debitæ fructum quàm cumulatissimè refe-
rendum. Hoc agamus igitur, Auditores,
bono die, læto ipsi, tristi nobis & ærum-
noso, iunctis vocibus & animis concor-
dissimi: &, si maxima eius in nos omnes
atquẽ immortalia merita minùs assequi
prædicando possimus, esto satis, qui mos
etiam Superis placere consuevit, agnouis-
se confitendo. Nec verò exigua solutio
putanda est aperta professio & voluntaria:
Aut in LEONE magis regium censerì
debet minuta accipere, quàm largiri ma-

gna. Clarissimum præbuit specimen Artaxerxes, qui profluentem aquam à rustico oblatam æquissimo animo rex admisit. Nos pias lachrymas, quouis humore tributum haud paulò purius, clementissimus Pōtifex quomodò fuerit, quâ inclinatione voluntatis accepturus, vllâ ratione dubitabimus?

Itaquè certâ fiduciâ tolerantiaē sacri vel Antistitis vel Herois, ad illam reuoluor laudum eius partem reliquarum, quas anno superiore sub hunc diem in extremâ oratione de eo habitâ leuiter perstrictas, & intento solùm digito commonstratas, pollicebar alijs deinceps sermonibus me fusiùs profecuturum. Dicam hæc, dicam ista, dicam illa, dicam alia multò his adhuc & gloriosiora & mirabiliora, tùm iactabam plenis buccis, theatri securus atquè campi, si rectè meministis, vt facere videmini, Auditores; præproperâ locorum occupatione, tam inulitatâ frequentia, tantâ audiendi cum summo silentio coniunctâ cupiditate, magnum certè quiddam, nouum, & reconditum expectantes. Quæ nè spes vos fallat, cùm omnia fuerint

in eo viro propè singulari verè cœlestia, nisi culpâ facultatis & ingenij mei deterrantur, operam dabo diligentem. Pudet enim Dofonis agnomen subire, quo Demetrii nepos olim apud Græcos populari ioco dictus est Antigonus, ex eo, quòd benignè promitteret omnibus, parùm deindè sollicitus, quæ recepisset, exoluendi cuiquam. Mouet me quippè illud, obstringitquè fortiter, quod in iurisconsultorum includitur formulis, Christianæ verò præceptis religionis habetur sacrosanctum, Promissio boni viri.

Signa iam atquè prodigia raræ cuiusdã de cœlo lapsuræ virtutis, ortum Leonis antegressa, cùm proximè diximus ex hoc loco, habuistis; suscepto in lucem non, infanti minùs ob speciem augustiorem, humanâ, quàm parentibus, illius causâ, benedixistis; è prætextâ pueritiæ direxi ephœbum ad virilem togam, per singulos ætatulæ gradus indolem eximiam collaudâstis; ab adolescentiâ (seruare placet medicorum tempora curriculum vitæ sic diuidentium, quò res incutiat maiorem, admirationem) ab adolescentiâ, quæ ter-

mi.

minatur vicesimo quinto anno, annusquē hic statuitur ipsis augmenti finis; corporis id quidem fortassè, sed in huiusmodi hominibus non item animi, nequē honorum, aut gloriæ: sumptâ, inquam, purâ togâ duxi ad iuuentutem, hoc interim spacio tum propria ipsius, tum fortunæ bonæ, cum veluti plenâ manu opprimentis, suspexistis; indè promoui altero decennio ad viri statum, quem isti vocant floridum & consistentem; tot ibi rebus præclarè gestis Achillem, tot extricatis summâ cum prudentiâ difficultatum nodis Nestorem, tot incommodis exantlatis, partim etiam felicissimè repulsis diuturnæ peregrinationis, Vlyssē proclamâstis; duobus pòst annis, ætatis videlicèt septimo & trigesimo tantum, cū eundem propter luculenta multa & incredibilia merita prouexissem ad orbis vniuersi imperium, id est, ad Romani Pontificatus tiaram, tum verò defixi miraculo & stupefacti ab omni seculorum memoriâ inaudito, sacrâ veneratione cohorruiistis. Quid si diuina in tam sublimi fastigio, conceditâ illi cœli ac terræ supremi Rectoris potestate, dicta
facta-

factaque minimâ ex parte declarâſſem ? credo, vt eratis tunc affecti, diſſoluto pluſculum ſpiritu præ dulcedine narrationis prorsûs animam egiffetis.

Ventum eſt ad periculum, Auditores; eodem recidimus: ſedent ex aduerſâ ripâ Sirenes, prætentant chordas, vibrante gutture (quod facile eſt diſcernere) ſecum neſcio quid remurmurant, parantur ad cantum: Fugiendum, fugiendum ocyûs velis equiſquè; nauis æquato remorum, impulſu ſcopulos inſidioſos præteruehēda eſt; ars & cera contra lenocinium quærenda Vlyſſea; aures obturandæ. At parcite tamen ſollicitudini huic tantæ: obiecit mihi ſeſe alia via ſecuritatis; veſter ego dux & gubernator ero inter Scyllam & Charybdin; orationis curſum aliò, tanquam nauigationis, deſectamus. Quamobrēm quòd de rebus cogitabam ampliſſimis largiter efferre per Prîncipatum ſanctè ab eo prudenterq; tranſactis, id in gyrum ſolius nominis, cur ſcilicet LEONIS appellationem, ſtatim vt Patrum Cónſcriptorû cunctis ſuffragijs Pontifex Maximus eſt factus, vnicè delegerit, includam.

Cu-

Curiosæ certè multæ & cōmemorandæ notions in eâ disquisitione continentur. Hinc porrò virtutes regias omnes, vt ab igne flammæ, & radios à Sole, videbitis existere. Quod ordine vt fiat, delectetquè impensius, à capite quædam erunt arcescenda. Reuocate animum ad memoriam iustorum funebrium superioris anni: subibit facilè recordatio somnij portentosi, quod in Reparatæ templo fecisse Florentiæ Claricem Vrsinam narraui lectissimam foeminam, eius matrem. Ea sibi pleno iam vtero miræ Leonem magnitudinis & lenitatis nullo labore parere visa est. Quod postea somnium ex nutricum fabulis, vt fit, cū ingenio puerili adhæsisset, ansam nominis sine dubio, laudum maximarum, quas affectabat, fouebatquè in pectore, certissimi indicis, Ioanni antè vocato præbuit. Præterquàm enim quòd Romanis Pontificibus is mos ratus atquè sollemnis iam indè ab alterius Sergij vetustate semper fuit, accessit insupèr alia causa præcipuè ipsi concupita, notâ vt aliquâ declararet, tacitâ quidem, sed eruditâ, naturam suam. Nam quid est, aut excogitari magnum

gnum vsquàm potest, tam amplum & nobile, tam clemens ac liberale, vigilans, moratum, industrium, quid deniquè tam excelsi animi & inuicti, quod prolata Leonis voce, non eodem simul tempore loquentibus obuerfetur?

Vitiositatem omninò nullam, complures autem & raras prærogatiuas admirandæ præstantiæ consignauère literis de fortissimo atquè generosissimo animalium, adeoque rege omnium Leone, qui res à naturâ inuolutas perscrutantur. Iisdemquè, cùm omnia depròmpserint, adhuc tamen vociferantibus superesse maiora, terminatur ferè præconium huius belluæ sic, eam vt solam cuiuslibet virtutis quasi figuram ponant Ægyptiam. Ità ingenium solent extollere, fortitudinem corporis, largitatem animi, iustam iram, lenitatem, prudentiam: tum illa decântant grandiori tubâ, quàm sit iniuriarum memor, & pro culpæ modo vindex, quantæ abstinentiæ in potu atquè pastu, qualem vsquè vigilantiam toleret indomitâ & assiduam, vt apertis semper oculis dormire videatur. Demùm infinitis præterea diuitijs coeli
beni

benignioris, ac dotibus illi inſitis & annexis, quas pro imperatâ breuitate longum eſſet enumerare noſtri laudes ad LEONIS feſtinanti, non complent modò vtramque paginam, verùm etiam producunt totos libros. Vnum tamen præterire, plenum iudicij & rationis, quod Plinius tradidit locuples author, nullo modo poſſum: quippe enim ſola hæc affectio, ſi mòx in contentione vtriuſque maximè LEONI cōueniſſe Pontifici adductis exemplis oſtendero, nimium quantum valebit ad augendam de illo opinionem. Quid ait? quæ variè ſparſa leguntur, vnâ collectione ſubijciam. Quid ait ergò? Generoſitas animalis inter pericula deprehenditur præcipuè. Leo vulneratus obſervatione mirâ percufforem nouit, & in quantalibet multitudine appetit intentum. Eum verò, qui telum iaculatus non læſerit, correptum immani rictu raptat occifuro ſimilis ad terrorem, nec offendit. Ex feris clementia ſoli obſtigit inſupplices, proſtratis parcit. Atquæ hæc Plinianâ fide; verbis, vt locos conciliare meis.

Vestrum ego nunc depoſco ſenſum cogitationemquæ, Auditores; vtrùm iſta fe-

rina

rina siue præsidia, siue ornamenta, si in aliquo vno homine collocata cerneretis excellenter eminere, non eum inter cæteros, qui vel pauca sortitus esset, principem; qui plura, regem; qui vniuersa, imperatorem; qui adhæc alia decora nactus longè sublimiora, quendam, vt ita dicam, terrestrem Deum putaretis? At in LEONE Mediceo huiusmodi lumina cōgesta supra modum & illustria fuisse fateamini comparando necesse est. Agedum, ite mecum per singula. Sed quoniam coarctor ad expediendum, tum iussu moderatorum, quibus obsequi debeo, tum fastidij metu vestrum omnium, quos & retinere cupio & dimittere contentos, longiusquè hoc esse negotium videtur, quàm vt tam angustis orationis hodiernæ spatijs possit includi; Ptolemæi faciam more sectatorum, qui dùm aptam per figuram totius cœli situm ponere volūt in prospectu, quatuor cardinum designant stellas, quandoquè etiam vno tantum ex angulo quod relinquitur, obiectâ quasi Timantæâ tabulâ, satis habent indicare. Itaque paucas ex infinitis virtutibus libari conueniet,

niet, quæ sint pontificiæ amplitudinis, hoc est, Deo in terris proximæ maiestatis propriæ, quarumquæ velût extet in turba nitor & emineat, vt ex ijs cæterarum coniecturam, & existimationẽ informare possitis.

Virtutes in principe commendantur à politicis philolophis maximè tres, Pictas, temperantia, mansuetudo, seù eum ad eundem facilitas: quas artis canona regiæ ijdẽ appellauẽre. Nos in Pontifice volumus eas altiorum generum esse partes; quibus præditum regibus illum decet tantò magis excellere, quantò antestat potestate. Non longè ab eo: syluam Leo suppeditat, vndè quamuis magnâ copiam licet decerpere. Sed ternæ virtutes, itidẽm vt illis, erunt nobis satis; quas etiam splendido nomine decorabimus, & catenam Platonis, quæ cælum cum terrâ coniunxit, contra istorum canona, Polycleti intellectam regulam, non absurdè dicemus. Quænam tandem sunt istæ? magnanimitas, eadem, mansuetudo (sed significatione mutatâ nonnihil, vt misericordiam vocaueris rectius) postremò vigilantia. Hẽm, quid istuc audio? inquiet aliquis: itanẽ verò,

pie-

pietate maius atquè temperantiâ vt in supremo religionis antistite statuatur quidquam? Ego verò non statuo, reputo citiùs ijs quasi gradibus ad Pontificatus apicem peruenisse. Id quod etiam satis, vt opinor, aliàs ostendi. Ad caput enim magnanimitatis retuli vtramque cum Aristotele, quasdam veluti differentias. Quoniam igitur vnâ excellentissimam Leonis doctem in nostro Principe vberrimis tum exemplis eluxisse monstratum est, quâ summos ad honores præmaturè aspirando, quâ munera grauissima reipublicæ vel suæ, vel Christianæ totius gloriosè sustinendo, quâ se audacter obijciendo periculis, quâ viriliter tolerando diutini pœnam exilij, tum innumerabilibus beneficijs quoquouersum dispersis in homines, tum nullis simulationum inuolucris aut recessibus occultæ mentis, eo deniquè vultu in omni fortunâ, vt nunquam à statu generosæ indolis discedere visus fuerit, nunquam à dignitate sapientis; illam partem de tribus, actum agere metuens, silentio pretermittam in præsentia, mansuetudinis & vigilantia laude quantum præstiterit, quàm similem se

D

Leo-

Leoni gesserit ac geminum , persequar ,
sicut erat propositum , deinceps .

Atquè illa prædicetur lenitas primùm ,
quam somniauit eius mater , cæteri verò
mortales rem solidam & expressam viui
(quod dicitur) & videntes ingenti suo bo-
no compererunt . Siquidem amicis exhi-
beatur , & de nobis non pessimè meritis
ea benignæ propensio voluntatis , erit iure
celebranda ; si post grauem offensionem
ad hostes etiam incubuerit , non celebrâda
solum humanis verbis , sed honore propè
diuino consecranda . Cuius eximiæ virtutis
cùm in Pontifice re peræquè , vt cogno-
mine Magnanimo , exempla suppeditant
varia , & insignia , tùm vna cõiuratio fidem
plenissimè facit Petrucciana . Quid enim ?
ô placabilitatem admirandam , incredibi-
lemquè remissionem ! quid aliud cupie-
bant furiosissimi homines (nota est histo-
ria) quid machinabantur , quid anhelab-
ant , nisi vt Romanæ Sedis maiestatem ,
sanctimoniam religionis , literaturæ colu-
men , beneficentiæ asylum , exemplar li-
beralitatis eodem nefario parricidio , si
fortè contigisset , omni doctrinâ & virtute

orna-

ornatissimi Principis sepelirent ? Ipse tamen extremo supplicio sumpto de Alphōso Petruccio, tanti sceleris authore atquē antesignano, cum duobus seruis post corporis lacerationē peracerbā infami trunco suspensis, ultum se abundē ratus, conscijs reliquis promptissimē poenam mortis, primarijs viris, supplicibus & prostratis, impositā pecuniæ vel exilij tantū modō mulctā, condonauit. Vultis clementiæ documentum, Auditores, luculentius? ex nullis certē nequē ego annalium monumentis eruere aut legere, nec vos alicubi audire, nequē mundi Sol oculus vllō circuitu gentium ac regionum aspicere maius, vix par aut simile, vnquā potuit.

Quod cū ita sit, & diffiteatur nemo, verū pedibus eam libenter in sentētiā quilibet ierit; quēso, vt parcatur inutili viæ, atquē ad expendendam potius eiusdem, inirificam vigilantiam, quæ laus similitudinis ponēbatur tertia, fiat gradus. Nolim intelligi, dūm vigilem dico, quasi corporis apertis oculis magis, quā intentissimā mentis acie in omnes partes excubārit. Alia longē hominis & belluæ pro-

fectò ratio est . Haudquaquàm enim similitudo præfens tam imaginẽ habet , quàm collationem . Nec verò labes huius animalis atque necessitas quantumvis præstātis ad clarissimam sanè virtutem primi Sacerdotis maximequè voluntariam traduci debet . Nullo tempore dormire prorsùs feram videri , id est , somnum arctum capere, liber memorat is, . qui circumfertur incerto auctore , de naturâ rerum : causam esse scilicèt , quia oculus illi magnus contigit , & pellicula incumbens curtior , quàm vt orbem tegere totum queat : rectè fieri autem in cæteris animantibus iudicandum , quandò palpebræ inter se commissæ fuerint , ac veluti obfignatæ . L E O Pontifex , si quisquam alius , ad vnguentum usquequaquè factus , & apprimè conformatus , quicquid fecit , sponte & voluntate faciebat suâ , nullâ vi , nisi conscientia officij , astringente . Vt mihi certè de totâ re acriùs subindè cogitanti , tum de hoc gloriæ & felicitatis humanæ , nè dicam , beatitatis altissimo fastigio , tum de illo , quicumque singularibus promeritis tantum sibi gradum subiecisset , per & scienter

enter & appositè videantur nostri patres, sanctissimi viri, maximo eidem, quem nos vocamus promiscuè cum falsorum Deorum priscis cultoribus, Pontifici, summi pastoris & episcopi nomen imponendo, decreuisse. Quâ voce utrâque rectoris auditâ, regnum ipsum non iam dignitatis aut otij nomen esse comprehenderit quispiam, sed seruitutis atquè curæ. Quid pastorem constituit tandem? nonnè ouile, ac numerati pastio gregis? quid episcopum? an non statio permanens in custodiâ eiusdē gregis, tanquam in speculâ, contra prædonum incursum, & luporum? Significabit plus fortassis pastor populorum appellatus rex aliquis Homericus, aut magistratus ille Atheniensis à prospiciendo dictus, quem & Harmosten Lacedæmonij, & Cōsulem Romani, nisi me fallo, vocauère; imò nobis congruenter, sacerdotum præfultori Plutarchus in Numâ, suæ linguæ retinens, episcopi verbum accommodauit; quàm præfectus Christianis sacris, auctorquè & magister secundum Deum publicæ religionis, titulis ijs ipsis insignitus? qui hoc putet, multò minùs qui velit affirma-

re, tam inconsultum ac temerarium equidem credo inueniri neminem. Benè habet: iactis fundamentis, assurgit indè exædificatio facilis illius, quam viris in infulis virtutem theologi cùm vniuersis, tum præcipuè tribuunt omnium coryphæo peculiarem & vnicam, vigilantia. Huius vocis cum latitudine notitiam haud inculco amplius: quem sedulum, quem attentum, quem sollicitum, quem animo, claudat licèt oculos, excubantem & erectum cognoritis, eum vos hominem laudis tam diuinæ maximè participem censetote.

Video me iamdudum, Auditores, expectationē vestram tenere suspensam; scio, quorsum spes inclinet, ac voluntas singulorum: lucidissimam istam gemmam pontificali vt insertam diademati, & historiæ fide contestatam, in Maximo LEONE præsentem. Geram morem honesto planè desiderio, amoriquè nescio in illum, an in me ipsum propensiori: ità hætenus, quicquid hoc esse potuit orationis, collatis studijs, totquè benevolentia non vulgaris, atquè vrbaniſsimæ humanitatis illustribus indicijs excepistis.

Com-

Commodum LEO Christiani rectoris
 imperij nauim ad gubernaculū accesserat,
 cū magnæ vndiquē tempestates seditio-
 num & discordiarum vel domesticæ vel
 externæ, magistri noui veluti artem ten-
 taturæ, surrexerunt. Bellum quidem cœ-
 ptum iam & accensum offenderat per Ita-
 liam, dissidentium inter se regulorum fa-
 ctiones Gallo & Hispano, Germano item
 ac Britanno, prout in hanc quisq; illam uē
 partem affectus erat, perpetuis copijs fo-
 uentibus: quomodo se habuit inter fluctus
 communis parens, atquē gessit? sedit os-
 citans, credo, & dormitans, rumorū
 & periculi dux securus: imò verò totā mēte
 in eam curam dies noctesquē incubuit, ut
 potentissimos Europæ reges Legatorum
 suorum operā conciliatos ad inferendum
 aliò bellum auocaret. Quod & consecu-
 turus propediēm videbatur aduersus ty-
 rannum Othomannicum, nisi Maximiliani
 mors Cæsaris infelici quodam fato trans-
 uersa incurrisset. Illud obtinuit saluber-
 rimā consultatione quidem certè, ut eie-
 cto armorum igne concordia Principum,
 paxquē patriæ remaneret.

Transeō ad extera, Selymum ea tempora habuere Turcarum imperatorem; & suopte ingenio præferocem hominem, & victoriæ licentiâ, nouisquæ usquæ successibus insolentem. Is enim duobus Memphiticis regibus acie nuperrimè cæsis, Syriam; quemadmodum paulò antè fuso victoque Hyfmaële Persarum Sopho, Assyriam, & Persidè, maioremquæ Armeniam imperio suo adiecerat; iamquæ Pannoniæ prædabundus, vltimo Christiani orbis propugnaculo, atque adeò ceruicibus & iugulis nostris imminebat. Hic enim uerò cernere erat impijs barbari conatibus oppositam LEONIS, vt vniuersalis episcopi, cum diuinâ prouidentiâ, & commemorabili pietate mirificam pugnam. Non signa contulit, non conscriuit manum: id erat vulgare nimis, atquæ vsitatum: sed cælesti genere præliandi vsus, quippè qui vicariam Dei Fortis gerebat potestatem, vi precum & sacrificiorum eum usquæ à Româ, tanquàm missorum balistâ fulminum, repressit. Nam horribilis canceri strumâ, vt credere iustum est, ab alto inflicta post aliquot dies miserè exesus & absumptus, fili-

filium reliquit commodiorem . Speculatorem vidistis è pharo Sanctæ ciuitatis diligentem contra prædatorē;pastorem nunc eundem è septem Montibus contra lupum accipite vigilantem . Odium intercedere Leoni cum thoë capitale ac penitus insitū (thos autem forma quædā in lupino genere dicitur valdè mordax) scriptores narrāt ij, quos adduxi suprā . Præclarè cum primis hæc naturæ quoquè cōditio LEONI nostro conueniet , siquidem verę & auitæ adulteros fidei , siuè cudendo hæresin aliquam nouam , siuè sectando , iure ac meritò lupos licet appellare . Talis omninò , Cerberus ille, funesta fax ac fatale prodigium, desertor partium, & Catholicæ transfuga religionis Lutherus extitit; insidiator occultus primùm & intestinus Germani candoris , pòst etiam sanctitatis Romanæ, recti cultus in Superos, sacrorum, & ceremoniarum parentis ac magistræ, longinquus hostis & apertus . Detexit è vestigio bonus custos cuniculos LEO , mouit omnem lapidem aduersus nefarium raptorem, quacunque ope poterat tum priuatâ, tum alienâ, fugitium vsquè ad viuam cutem

tem persecutus est. Quo factum, ut post excussum diræ diplôma deuotionis tanto loci interuallo in scelestissimum caput, Carolum Augustum deindè præsentem induxerit, coacto concilio procerum vtriusque ordinis apud Vormatiam urbem, non ut perfidi furorem hominis modò castigaret, atquè petulantiam, verùm obscœni quoquè oris, fœtentisquè pectoris semicoctas vomitiones, eius videlicèt famosos libellos, uti moribus ac religioni pestilentes. manu iuberet carnificis in medio foro cōcremari. Luculentum planè testimonium, dignumquè Cæsare, datum censorio iudicio Pontificis!

E trium itaquè virtutum expositione, maximarū, tanquam è compendario freto (nam vastum illum cunctarum laudum Oceanum perhorruì) tandem in portum, beneuolæ prouecta concionis aurâ, enauigauit oratio. Vos, vos, inquam, mihi, Viri humanissimi, de materiâ supra vires qualicunq; modo differenti, & fecistis animos, & feliciter adspirâstis. Proquâ quidem officiij plenâ voluntate maximas vnicuique ago gratias, maiores etiam habebō

bo semper. Dixi de ornamentis duntaxat
 animi, ijsquè paucis, & ad temporis, &
 ieiunitatis meæ angustias indignè habitis
 & contractis: quòd si lineamenta pariter
 corporis quædam attexere licuisset eximiâ
 venustate conspiciendi, næ ista prima vir-
 tutis præconia in natiuo vase atquè rece-
 ptaculo suo, perindè atquè pretiosæ gem-
 mæ in auro obryzo illigatæ, si minùs effi-
 cacitate sermonis, at certè ratione soda-
 litij commendata, longè magis resplen-
 duissent. Quorum tamen summam ex par-
 ticolâ, quam subiiciam, volo degustetis.

Erat enim LEO cùm formâ, tū specie, tū
 staturâ deniquè appositâ omni ad venera-
 tionem. Proceritas illi, qualem Heroïbus
 ferè pictores affingunt, excelsa constabat:
 habitus corporis succosus potius, quàm
 pinguis, & quidem per artus singulos gra-
 tâ proportionè diffusus: teretia directaque
 crura: manus candore figuraquè niuæ,
 & quasi tornatæ: vna capitis amplitudo cæ-
 tera membra enormi propè excessu, nec
 tamen aliter, quàm velles, superabat. Ex
 ore suauitas afflabatur tanta, nihil vt vl-
 trà: cæsi oculi, & admodum acuti: nasus
 leni-

leniter declivis : turgidula labra : quid loquar de vultu toto, de voce, de gestu, de incessu ? plenissima cuncta maiestatis .

Vndè mirum profectò non debet videri, vel quòd euoluto pueri natali die planè fortunato, liberalissimaquè personæ inspectâ specie, Marsilius Ficinus, nobilis physiognomon illius temporis, sacrorum ei principatum, cùm nullis dùm initijs esset sacer, prædixerit : vel quòd ipse tam præclaris munitus optimæ naturæ præsidij iam Pontifex Maximus à Senatu Populoquè Romano marmoream statuam cum elogio post conditam Urbem honorificentissimo, propter incredibilia & perpetua merita atquè beneficia in omnes ordines, meruerit solenni decreto dedicatam in Capitolio, ad memoriam posterì temporis sempiternam. Proferatur exemplum, sanè perdisertæ inscriptionis, palamquè hoc loco recitetur :

OPTIMO PRINCIPI, LEONI X.
MEDICEO IOANNI,
PONT. MAX.

Ob restitutam instauratam-
què

quæ Urbem, aucta sacra, bonasque artes, adscitos Patres, sublatum vectigal, datum, congiarium, S. P. Q. R.

Prò Deus immortalis ! quantum bonorum quàm paucis verbis modo Chilonio comprehensum ! Voces singulæ, nè dicam facta, singulis orationibus benè longis duci mediùs-fidiùs & extolli à Cicerone aliquo vel Demosthene pro dignitate deberent. Ego, quod ad me attinet, supra infrauè titulum pulcherrimi monumèti cùm habeam nihil, quod adiungam, summèque cupiam in eo pro coronâ finis consistere, rapior tamen retrò, & adhæresco tantisper ad illa verba ; Ob instauratam Urbem, auctasquæ bonas artes.


Hîc res agitur vestra, *Patres* : hîc vos etiam, *Doctores*, designati estis. Alteris Urbis reitutæ primam partem, quam equidem interpretor esse hanc florentissimam Academiam, demandata moderandi cura est, quod fit & acriter & diuine ;

nè ; alteris reipublicæ benè constitutæ primum munus , sine quo nè resp. quidem possit esse , scilicèt ad optimos mores & disciplinas eruditionem iuventutis , quod præstari etiam diligenter & studiosè video mirari gentes omnes , labor inibi sustinendi . Maçti estote vtrique sollicitudinis istâ & virtutis laude singulari , tantiquè auctorem honoris & gloriæ vestræ , dignâ memoriâ atquè celebratione , assiduâ priuatim quidem & decente , publicè verò magnificâ & annuâ , prædicando amissum , vt facitis , recognoscite LEONEM . Hortarer etiam ad dolorem continuum , & ad planctum , & lachrymas , propter iacturam vnus post homines natos longè optimi Principis , & liberalissimi Patroni ; nisi hodierno die longo interuâllo ALEXANDRI successio impediret . Regnat ALEXANDER , regnetquè precor Nestoreos annos , vt nomine æquè magno , sic & pectore , & animo ad res gloriosas Maximo in æuum omne Pontifex decantandus . De cuius admirabili sapiëntiâ , pietate , doctrinâ , grauitate , vigilantia , & , quod huius loci præcipuum est , erga Collegium nostrum

ar-

ardenti studio, ac sumptuosâ largitate,
fatius est nihil, quemadmodum inquebat
ille de Carthagine, quàm parùm dicere.
Nec verò opus est verbis, vbi testimonia
tot rerum, tamquè illustria loquuntur.
Vrbs decorata clamat; redintegratus or-
bis vociferatur vniuersus. Concludam
ergò cum LEONE. Quod in Circo iactaba-
tur olim ad supplicium & infamiam no-
centium & miserorum, id nunc,
omniquè ætate consequenti,
siqui scientiæ, religionis,
& vlliùs omninò orna-
mentum hone-
statis
adipisci volent, hâc audient ex Palæstrâ
permutatum in gratiæ decus &
honoris conclamari,
A D L E O-
NEM.

D I X I.



I A C O B I A L B A N I
 GHIBBESII,
 in Romana Sapiencia Rhe-
 toricorum Interpretis,
 FVNEBRIS ORATIO,
 LEONI X. P. M.
 MEDICEO PRINCIPI,
 PARENTI OPTIMO
*Iusta inter anniuersaria, & Sacra sollem-
 nia eiusdem Lycei, noua in AEde,
 V. Kal. Mart. M. DC. LXI.*
 PVBLICE DICTA.





ORATIO III.

(AD

*FERDINANDVM II.
MAGNV M DVCEM
HETRVRIAE.*



QVOD precatus sum à re-
rum omnium moderatore,
huiusquè Collegij & studio-
rum nostrorum præside ac
tutore Deo, quotiescunquè
mihi de LEONE, Pontifice

Maximo (cuius prolixæ liberalitati totum
hoc literarum & otij referimus acceptum)
pro concione quotannis dicendum erat; vt
ea laus Principi, æternâ memoriâ nominis,
& perpetuâ gratiarum si minùs solutione,

E

præ-

præsentium, at certè debitarum prædicatione dignissimo, regisicè dignequè tribueretur: id votis hodiè primùm diuino beneficio, deindè incredibili regnantis ALEXANDRI sumptu, & consilio, & virtute concessum ac donatum esse, maximè lætor, Auditores. Prodibit iam nō tanquàm è speluncâ, sic ex angusto atquè obscuro gurgustio, quod isti hætenus præconiorū tributo destinabatur propter inopiã Templi, summâ cæteroqui in structuræ, quantum ad docendi discendiquè munus attinet, elegantia & laxitate; prodibit, inquam, posthac Leo suis coloribus spectabilis in apertam lucem, locoquè venerandus confidebit haud impare maiestati. Sinite me per luctum vestrum, Auditores, à ferali Libitinæ pompâ, quæ, quamcunque in partem obtutum conijcio, ferit oculos, ad iucundiores speciem, comitibus vobis, eos tantisper cum mente vagando traducere.

Esto meta intensiōis hæc ipsa recentis fabricæ, ac nouæ formæ & famæ superba moles, in quâ nos primi non sine honoris prærogatiua dicimus, ab Alexandro, supremo

premo Sacerdote, atque adeò gentium,
 omnium domino ac magistro, Diuis præ-
 stitibus in sacrarium, amœnis Musis, at-
 què orbi disciplinarum seueriorum in san-
 ctioribus officijs ad vsum & coronam, cum
 magnificè extructa, vt videtis, tum verò
 suæ nuper declaratione præsentiae, quod
 stupuistis, perquàm religiosè consecrata.
 I nunc, immodici cuiusdam amoris erga
 literas & literatos in maximis Principibus
 admiratrix vetustas. Ptolemæum desine
 Philopatora prædicare Ægypti regem, aut
 Mithridatem Ponti; illum, quòd Homero
 templum posuit, hunc, quòd Platoni sta-
 tuam erexit, egregium Sydonis opus, in-
 ciso etiam in basi nomine: parce Pompeio
 laureato nimium deferre, clarissimo im-
 peratori, propter eius benignam Rheto-
 rum & philosophorum audientiam Rhodi
 & Athenis: nec illa victoris acta Mac-
 donis inter armorum strepitus, cladesquè
 hostium, & opimas manubias, extolle plus
 æquo amica pacis, vt quomodò capto in-
 ter spolia Darij, Persarum potentissimi re-
 gis, vnguëtorum scrinio, quod erat auro,
 gemmis, ac margaritis pretiosum, libros

modò laudati Homeri, quos tanto dignos
 loculo existimabat, incluserit; vel, cùm
 euerteret Thebas, atquè in ciues temerè
 sine vlllo delectu sæuiret, Pindari vatis pe-
 natibus abstinere militem spe prædæ ma-
 nus, & in victoriæ cursu auertere ferrum
 iusserit; vel, quòd pro Mineruale, grati
 animi tesserâ, præceptoris sui nomini ac
 memoriæ Aristotelis condiderit urbem,
 hominumq; ei multa millia ad parendum,
 rerum cùm scriberet commentarios natu-
 ralium, paratissima subiecerit. Vicit hæc,
 vicit vniuersè noster hodiernus Rector vno
 solo, sed raro, sed magnanimo, sed post con-
 ditam Urbem inaudito specimine comita-
 tis, & clementiæ tot exempla singulorum.
 Ita nimirū Alexandri propriū semper fuit,
 res supra hominem præstabiles, ac heroum
 generi tribuendas & moliri, & gerere.

Agè verò, reuocabo vos ad iucundis-
 simam recordationem proximi temporis,
 quod præfectò sine inexprabili flagitio nū-
 quam obliuisci potestis. Ecquæ lux orie-
 tur in posterum cum illâ comparanda, quæ
 postridiè Id. præteriti Nouembris huic Aca-
 demię multo manè, veniente ipso cum
 suis

suis Purpuratis, administris regum, & pro-
 ceribus Urbis, lætissimè affulsit? sic quidem,
 ut solum medius-fidiùs ubi institerat, atri-
 um quàm transitus ædi sacræ successerat,
 tota ædes quam solenni tunc ritu effatus
 est, parietes omnes quos aspexit, altare
 cui litauit, tholus qui operuit; indequè
 cùm digrederetur, ascensu facto ad ma-
 ximam aulam, doctorum facultates audi-
 turus, scalarum gradus illius non oppressi,
 magis inflati vestigijs, porticus ducens viâ,
 exedra tantâ gloriâ, quantam nè sperare
 quidem potuerat vnquam, circumfusa;
 subsellia, suggesta nostra; sed multò ma-
 ximè propiore tactu honorata Sedes ipsa
 Pontificis; ante recessum deniquè spatium
 fastigio in eodem illud omne aulæ interie-
 ctum & bibliothecæ, quam breui dixeris
 Amalthæam, delicijs & amoribus doctissimi
 Principis, cuius potissimùm, & templi gra-
 riâ nos inuisit, quippè vtriusque suæ (nunc
 alia ut fileantur huc collata beneficentiæ
 monumēta quàm plurima) Leoninis scho-
 lis amplissimæ accessionis: veluti xystrus,
 intercolumnium, testudo, pavementum,
 tum vastitas bibliothecæ, armaria libro-

rum, laquear tectorio opere affabrè concinnatum & productum, fenestræ, telamones, pergulæ, mœniana, cæteræ proiecituræ, collucere adhuc à tanti Solis vel iactu radiorum, vel à splendore virtutum relucere videantur. Quàm illud aptè personæ cælestis descriptum signum à summo poëtâ conferri in eum ex merito potuit, dùm eas gratiæ tam singulares beneficij; partes obiret, diuinus decor, & oculi ardentes! vndè exstitit illa omnium admiratio, quotquot adfuerunt;

————— *qui spiritus illi,*

Qui vultus, vocisq; sonus, vel gressus eunti,
ex insequenti versu contemplantium. O factum memorabile! ô lætum diem, atq; fortunatum! & Capitolini non modò factis inferendum, verùm etiam inter gentes vniuersas & nationes ad æternitatem gloriæ propagandum!

At facio-hè ego ridiculè magis, an inconsultè, qui flebili monodiâ defuncto Leoni, patrono quondàm huius Lycei præcipuo atquè amantissimo, parentare ingressus, ad quem finem lugubre istuc omne funeris choragium adornatur, Pyramis primùm

mùm sepulchralis in medio excitata , de-
 indè ex ordine cerei caliginoso circum lu-
 mine ardentes , tot simulachra mortis vn-
 diquè affixa , pullis peristromatis obdu-
 cti parietes , ara cum sacerdotibus ad lu-
 ctum comparata ; preces inferijs oppor-
 tunæ, symphonia (an lessus?) miserabilis,
 vester iste frequens confessus cum tanto
 silentio , nisi quòd effractus interdum sus-
 pirijs auditus innotescat , hoc agens vix
 perceptâ præsentia ; quæ me cuncta com-
 monefaciunt mœstissimi officij; nihilominus
 Alexandrum , parentem alterum , saltans
 extra chorum , festâ laudum panegyri vi-
 uum & videntem tollere in cœlum haud
 prorsus opportunè , vt videtur , conten-
 derim? Non enim deerit argutulus aliquis
 literator, qui cum irrisione adunci nati, vbi
 placidis immitia coire per intempestiuam
 eloquentiam animaduernerit , pluuiumq;
 describi arcum (vt loquitur , vetatq; præ-
 ceptor Venusinus) in eluuiione Deucalion-
 næâ senserit, inculcet grande sophôs, eugè,
 bellè; sub exceptione tamen, sed nunc non
 erat his locus . Quî non erat locus his? dic
 nunc fodès , Mome mi : ità nec aërem vo-

lucris, nec piscibus aquã euiceris aptam
esse vel naturalẽ. Quĩ non locus? cùm vtri-
usque Põtificis virtutes eo præsertim in ge-
nere doctrinę studia promouẽdi, cultoresq;
literarum honestandi, & verò nominatim
hoc ipsum emporium ingenuarum artium
stabiliendi & illustrandi, fuerint perpetuò
tam similes, vti laudes vnus sine præclarã
quãdam laudum alterius celebratione pro-
pter implicitam & permistam conuenien-
tiam efferri aut commemorari nullo mo-
do possint. Bonum factum igitur: neque
ideò prudentis cuiusquam reprehensionem
verebor, quòd Leonis iacturæ, quam feci-
mus, magnum quæstum qui in successore
consecutus est, hoc est, lamentabili nænię
ob illum nobis ereptum, de Alexandro ad
nos eosdem è cẽlo demisso, vocem ali-
quam gestientis gaudij paulò hilariorem
subierit, quasi Pæanem, accinere. Mere-
ris, Alexander, hymnum profectò istum
ex eodem puluinari sumptuosissimi tui
templi accipere, quod virorum fortium,
hominumq; sanctissimorum gestis gloriose
rebus decantandis summã religione addi-
xisti. Quoties illorum pulcherrima facta
refri-

refricabuntur , totiès ingentis animi tui ,
 totiès sapientiæ , virtutis, felicitatis mentio
 fiet, ac pergrata excitabitur recordatio .

Quid expectatis , Auditores, (vt me re-
 feram ad Leonem , præcipuum finem
 institutæ laudationis) dùm fortassè nigro
 apparatui, & denicalibus hisce sacris con-
 color abs me sermo, tristis & lāguens, pro-
 ficiscatur ? Gaudeant extremo isto vel ho-
 nore , vel solatio , vulgares & obscuri ma-
 nes , quorum cum interitu simùl extincta
 terræ huius perière bona omnia , non eo-
 rum, quæ diuina merita sua, præstansquè
 ac benefica natura vitam alteram non so-
 lùm apud Cœlites beatitate refertam , sed
 etiam inter homines gratos ac memores
 famâ vsquè beneuolentiaquè florentem
 iustè peperit nullo tempore cessaturam .

Talis erat LEO Mediceus, Pontifex Ma-
 ximus, heroi ante se nulli secundus , licèt
 decessoribus eiusdem nominis ordine
 Decimus , de cuius laudibus, hæc quidem
 inter Musarum vmbracula certi Apollinis,
 nulla vnquàm ætas conticescet . Vt sanè
 tumultum istum , qui mortuum repræsen-
 tat, intuear stomachosius, nec profectò sine
 inuo-

inuolutæ suspicione falsitatis possim ferre : quemadmodum nequè Callimachus olim Cretensum æquo animo sustinebat credulitatem, ab Eucmero Messanenſi quamuis theologo rem & scriptam & persuasam, Iouis sepulchrum inter ipsos in oppido Gnoſſo perſtitisse. Nec verò aſtruebat quicquam vetus inſcriptio ex eis Græcis literis appoſita Ζὸς Κρόνος, id eſt Latinè, Iupiter Saturni filius, ad faciendam fidem; cùm id totum potuerit eſſe ſimulatum: ob idquè, opinor, doctiſſimus poëta in Hymno ad Iouem Cretenſes vocat mendaces ſemper, qui Iouis oſtendant monumentum, cùm nunquàm ille obierit, perpetuoq; ſit. Affero carmen: hocq; libentiùs, quòd verſiculi etiam prioris hemiſtichium D. Paulus uſurparit:

Κρήτες αἰεὶ ψεύσασθαι, καὶ γὰρ τάφον, ὡς ἄνα, σείο

Κρήτες ἐπικτήναντο ὃ εἰς θάλασσαν, ἐπὶ γὰρ αἰεὶ.

Vani ſemper Cretes, inquit; etenim ſepulchrum, ô Rex, tuum Cretes extruxerunt, tu verò tantùm abeſt vt interieris, viuis ſemper. Addite enim uerò ſpecioſum & vos titulum, Quirites, iſti pyræ, quam ſtiuxiſtis; promineat emblema LAVRENTII LEO

notis

notis maiusculis ad eandem similitudinem pro epitaphio annexum : non ego vos aucthores egregiæ molis fuites appellabo : suadet hoc grati animi memoria fidelis, monet debitum, & quod caput est, religio iubet : sed ipsam molem nemo tenebit, quin appositè cum Græcis Cenotaphium dicam, interprete Marone, tumulum inanem; quandoquidè non ibi Leo continetur, haud aliàs mortuus; viuit ille, atque ità viuit, vt, si non spiritu, at virtutis igne animatus, nullo vèturi decursu temporis propter continuam admirationem hominum & sermonem videatur esse moriturus.

Verùm quæ virtus in eo tanta prædicationem tam mirabilem atquè perpetuam suscitauerit ali quando, foueatq; porro indies magis apud posteros, nisi vobis exposuero, murem credar pro leone, vt dicitur, ostendisse. Quæ virtus autem? ô immaturæ abortum vocis! quasi partem illi aliquam, non verò totum genus, quàm latè patet, attribuendum putem: immò ausim affirmare, nullam differentiam virtutis, aut affectionem ab Ethicis tam subtiliter constitutam inueniri, quàm non animus eius penitus

nitùs inſitâ , vltrâ quàm credibile eſt , mirum in modum decoratus effulſerit. Quod nè dubitare quiſquam poſſit , magno eſt argumento ſummum præmium , honoris Pontificatus Maximus in terris apex ad vnum ipſum , iudicio ſtudioquè Patrum Conſcript. ſupra ætatem , ſupra conſuetudinem , ſupra etiam propè dicam mortalitatem , in plenis ac iuſtis comitijs , ſine vllâ controuerſiâ , ferè abſque competitorè delatus .

Hoc loco percommodè accidit , Auditores , tùm ad veſtram ſubleuandam patientiam , tùm ad meam ipſius tarditatem ingenij tantis in rebus obtegendam , quòd prætermiſſis primæ ætatis rudimentis , intacto flore adoleſcentiæ , ſpe & expectatione iuuentutis non expreſſâ , ſtatim in viro præcox mihi necopinanti occurrit illius fructus , quem dixi modò , ſupremi Pontificatus , oratione delibandus . Ità occaſio tulit nempè opportuna , nunc vt differe-rem ; quandoquidem illa ſpecimina diuinæ cuiuſdam indolis à me fuère tanquàm præludia vicariæ cæli poteſtatis , alijs concionibus exaggerata ſæpè vehementer . Quo

ex

ex illustri fundamento cælestis primùm præsidij, tùm naturæ benignioris, deindè nascendi sortis ad clarissima quæque habilis & inexhaustæ, pòst assiduæ doctissimorum hominum institutionis, tùm firmitatis corporis atquè industriæ animi vegetæ in persequendis studijs, postremò voluntatis æmulæ domesticæ gloriæ, cupideq; maioris, fastigium illud tantum, ac tam excellens est erectum, quod suspexit orbis vniuersus. De quibus optimi Principis ornamentis sic, opinor, singuli etiam tunc vobiscum ipsi statuistis; nequè eum, qui augustissimo huic domicilio imperij, religionis, honoris, arciquè gentium omnium, præfuturus aliquandò esset, aliter informandum fuisse: nec qui ità esset informatus, non eidem præfici tandem cunctis populorum haudquaquàm per tabulam, sed viux vocis suffragijs, atque adeò plausibus decuisse. Dixi iampridèm (quod communi nunc vsu receptum est, vt fiat in laudatione clarorum virorum) non de singulis tantùm gradibus vitæ Leonis, verùm de signis quoquè, atquè prodigijs diuinitus ostensis, quæ nascentis ortum præcesserunt.

Nun-

Nunquam cœlum laborauit pro nihilo; magnum quiddam, & inusitatum portendit semper. Achilles, Pyrrhi, Cæsares, Scipiones, Hercules ita generati & suscepti, præuiam similiter declarationem instantis discessus à Superis habuere. Ingentes animæ propriâ ut curâ summi opificis proceduntur, ita nec communem naturæ cursum irrogato priuilegio sequi solent. Quid multa? Heroum alia est conditio, & hominum. Illis haud secus, ac benignis astris, plausus debetur nascentibus atque gratulatio, his in calamitatum salum projectis fletus & commiseratio: rursus illos fato perfunctos & remigrantes ad Beatorum cognatum cœtum Apotheosis excipit, diuinorum facinorum & memorabilium auctores, hos cum mors oppressit, eadem sepultura, quæ corpus, etiam eorum plerumque nomen, & memoriam factorum omnem contegit.

Quid vobis videtur, Auditores? connectite quamlibet insecutæ partem vitæ huius, quem celebramus, inclyti Principis, cum monstroso principio, quod antecessit ortum; percurrite singulas ætates;

reuo-

reuoluimini ad præstantissimos actus, quos aliquandò me narrante stupuistis : dubitabitis , credo , nec erit ulli satis procliue dictu , quid statuendum sit , utrùm è luto illum nostro ac putri genere hominem , an verò celsiore quadam satum origine , lætæq; portione atq; reconditâ cælestis aurgæ conflatum Heröa iudicetis fuisse. Dixi de vetustate familiæ , atq; amplitudine Medicei nominis cùm proprijs copijs & honoribus illustri , tum exteris regum affinitatibus longè magis insignitâ : super basim adeò præclari sanguinis ego statui, ceu trophæum, Leonis pueri optimam indolem , cui postmodum ipse vix adultus , in primo limine videlicet consistentis ætatis , non minorem , quàm Romani Copitolij , pro cono triumphum summus Pontifex induxit . Proh sancta fides ! ô meritorum , providentia numinis , ac remuneratio singularis ! & credet hoc quisquam , & credens non mirabitur , & mirans non obstupescet , itaque defixus non colet sacro silentio , aut ægrè tandem voci factâ viâ , non exclamabit , Rarissimum miraculum ?
ut , quò supremæ dignitatis , atq; honoris
alios

alios quamuis longa vita , rerumquè vſus maximarum , & ſumma prudentia ſenes vix perducit, tuncquè vnicum duntaxat , veluti phœnicem; is annorum triginta & ſeptem iuuenis , exemplo penitus inaudito, tantum culmen ſolâ commendatione ingenij, virtutis, grauitatis, hominibus ac Superis plaudentibus, aſcenderit . Mihi certè rerum annales publicarum ſtudioſiùs perluſtranti , atq; hoc immane promeritorum Leonis monumentum perpendenti , confundunt mentis aciem diſpar cogitationum ſpecies , ac figuræ ſubindè gigantum inſtar formidabiles , animiquè ſenſis ſubtrahūt verba, verbis argumentū, argumento diſpoſitionē, diſpoſitioni artem.

Quid agam , Auditores, quò me ver-
tam in immenſâ rerum ab eo geſtarum
varietate, nescio: cū multa dixerim, non-
dū inſtitui principiū orationis, cū reſtent
inſinita , nunquam reperiam exitum. Itaq;
ceſſent illæ rhetorum glorioſæ cantilenæ ,
materiæ copiâ exultantium: hæc ſeges eſt,
hic campus , hoc ſtadium , in quo excur-
rere, atquè vbi iactare ſeſe quamlibet ma-
gniſicè, ac triumphare poſſit etiam infan-
tis

tis & indiferti facultas oratoris . Expertus
 in me loquor, cùm nulla se cuiquam ob-
 tulerit argumenti maior vbertas atq; feli-
 cior , tùm ex abundantia nimirum laudum ,
 perindè atq; ex horto florum refertissimo ,
 quid potissimum carpam , laborem fieri
 seligendi . Veruntamen in curâ tam an-
 cipi gratiam habeo temporis angustiis cir-
 cumscripti , propeq; iam elapsi . Saturnus
 enim uerò alatus, ut tragicus Deus è ma-
 chinâ , opus erat , qui nodum expediret .
 Sufficiet mihi huius beneficio expectatio-
 nem vestram comparèdinatûs formâ pro-
 mittendo mitigare , In alium diem .

Nunc quod instat , nostraq; refert præ-
 cipuè , absoluamus . Ac cæteræ quidem
 virtutes eiusdem longè lateq; diffusæ com-
 municabantur cum quamplurimis , hæc ,
 quam prædicare aggredior , tametsi erat
 in alios quoquè homines libenter insum-
 pta , nihilò tamen minùs ita nos propriè
 singulos attingebat, ut intra solos almæ
 Sapientiæ parietes conclusa videretur . Ad
 se rapit illa , illa omnium consensione
 mortalium præstantissima virtus , ac vim
 & rationem eloquendi omnem absorbet

vna, quæ in eo præsertim eluxit, animi ad ingenuas artes flagrans propensio quædam, & liberalitas singularis. Non confector longinqua aut recondita; id enim foret vltra anni Solisque vias peruagari sine fine, sine metâ: faciam palæstritarum more: sicut enim isti pancratium, celebres illos quinque Græcorum ludos Olympiæ, vnâ in vrbe Peloponnesi exercebant impositâ victori semper coronâ; sic equidem per hæc Panathenæa, in quibus Minervæ peplum certatim tollimus, intra cancellos solius Romæ, lucis Italiæ, ac terrarum arcis, me continebo, dùm inibi non quinque, sed innumeris trophæis tanti Pontificis aspectandis theatrum pono: nec propterea seruo dignus vlllo, cùm vt maximè ipsum collaudâro, minimam tamen elogij partem sim putandus attigisse. Quis, armorum strepitu cùm linguæ & morum barbarie amoto, iucundissimam rerum pacem, urbanitatem, literaturam Quiritibus restituit? Leo. Quis Bembo, & Sadoleto, & Beroaldo, politissimi ingenij & perfectæ eruditionis homines, in lucem, & ad magnos honores euocavit? Leo.

Quis

Quis bibliothecam Vaticanam adauxit, conquistis vndiquè indè ex Oriente vsquè voluminibus, publicèq; commoditati proposuit? Leo. Quis florentissimum hoc gymnasium, Musarum domicilium, officinam Sapientiæ, bonarum artium sedem ita fundavit, vt nequè Bononiensi, nequè Antenoreo, neq; etiam Oxoniensi aut Parisino, vel doctorum præstantiâ, vel concursu discipulorum concedere videretur? Leo. Quis eidè pòst fundato certû censû & annum, accitis verò lectissimis Professoribus scientiarû (& liceat fanè hoc loco mihi cum vestrâ bonâ veniâ, Patres & Collegæ, nonnullos honoris causâ nominare) Hieronymo Butigellè prudentiæ iuris, Christophoro Aretino medicinæ, Augustino Suesano philosophiæ, suggesti mei moderatori Iano Parrhasio, linguæ Græcæ Calchondylæ Basilio præfecto; quis his, rogo, per amplum ex ærario & stipendium & auctoramentum addixit? Leo. Quis singulos vel mediocris etiâ nominis poëtas, cunctosquè generatim eximijs & nobilioribus instructos disciplinis tantâ benignitate suscepit, vt omnes iam signo dato, &

excitatis animis ad excolenda literarum studia vehementer accenderentur? Leo - Quis deniq; Augusti Cæsaris beatū æuum, vnoq; verbo ætatem auream Vrbi & orbi redonauit? idem ipse, religionis & muniticentiæ inimitabile exemplar, maximus Leo .

Quapropter non ob spem iam conceptam, sed ob probatam experientiam felicitatis, ab eruditis id carmen in arcu triumphali ad Hadriani pontem est inscriptum, quo superiorum temporum mores, præut tum vita fuit, lepidissimè notabātur:

Olim habuit Cyprus sua tempora, tempora Mauors

Olim habuit, sua nunc tempora Pallas habet .

Hæc eius benemerendi prolixa de Rep. literariâ, gratificandi q; ijs voluntas, qui studerent, cætera seu naturæ, seu fortunæ, siuè animi ornamenta sic lucis suæ splendore complet atq; amplectitur, vt contuentium oculos, non quia maior præstantiorquè reliquis (nam quid poni debet in summo illo viro inæquabile?) sed quia iucundior & gratior est aliquo radio affectis, in sese vna propemodum conuertat. Hæc alijs quidem clarissimis dotibus gene-

rosæ

rosæ mentis debitum , sed huius vnus
 præsertim beneficio vindicatum & asser-
 tum , ipsi suæ virtutis optimè conscio per
 emblemata Leonis nomen optione propriâ,
 orbe verò interprete vniuerso Magnanimi
 cognomentum attribuit: vt quod pauci
 (fas esto de Herœe memorantem heroicis
 vti versibus diuini Maronis) quod im-
 mortalis gloriæ decus per , inquam ,

—— pauci , quos æquus amauit

Iupiter , aut ardens euexit ad athera virtus ,

Dīs genitipotuere ——.

demoliendis atq; euertendis oppidis , ex-
 pugnandis prouincijs , profligandis exer-
 citibus , cruore hominum ac cæde diffi-
 culter inuenire , id ille mollissimo brachio,
 protegendis suis , adiuuandis etiam hosti-
 bus, liberandis ciuitatibus hæresum mon-
 stris , denunciandâ doctrinæ synceritate ,
 coërcendâ luporum rabie , tutandis ou-
 bus, ac prohibendâ interneccione quæreret.
 O proclarum custodem ouium , non sicut
 ioco & præter fidem solebat olim dici, lu-
 pum; sed sermone serio atquè verissimo ,
 patrumq; nostrorum oculis reseruato mi-
 rabili spectaculo , celebrandum Leonem!

Intellectum est satis jam superq; , Auditores , non dicam è iuba aut armo , id est, è sanctiore illo vertice pontificiæ dignitatis ; quantus fuerit Leo ; sed vel ex vngue, quæ proposui vobis, literaturæ nempè patrociniò , fibrâ vnâ duntaxat amplissimi pectoris , cognoscere potuistis . Itaque illa grandiora facta maiestatis & potentiae , adde etiam si placet sanctitatis, libens alijs ingeniolo meo diffusus relinquo celebrâda, nè culpâ vllâ deterantur ; nos partes agamus nostras (Patres & Collegæ) quas optimè percipimus, quas deberi scimus, quas negare sine scelete non possumus , diuinam ipsius sapientiam Romanæ huius Sapientiae nomine , quibus licet grauissimis verbis , candidè & nauiter extollentes . Doctissimis in Græcia hominibus placuisse legimus, tum demùm ciuitates & imperia felicia fortunataq; fore , cùm eorum moderatores optimarum artium, præsertimq; philosophiæ, studijs essent exculti . Quod Platonis , opinor, decretum hætenus à discipulo reprehenditur, vt principes valdè quidē eruditos ipsos esse neget oportere ; quòd id & otij nimium exigat , & , si vehemen-

menter fiat, non satis afferat dignitatis. Optandū illud verò, vt, quod in se minùs habent, id in alijs adamare cōplectiq; velint, & ad eius cupiditatem honorū ac præmiorum illecebris inuitent, quam maximè possunt. Leo Pōtifex, tametsi hæreditario quodam iure transmissio à maioribus, præcipuè Cosmo proauo, & Laurentio genitore, in omnem scientiæ fundum, tanquam possessionem propriā inuolāssset, ab ijsq; ardentis & rediuiuæ virtutis lumen per manus, vti in studio cursores vèteres lampada frequentibus tradere soliti erant, iustissimā successionē accepisset, atque adèò Græcæ, Latinæ, ac Etruscę linguæ lautitijs esset eleganter, vt nihil suprà, perpolitus, nihilominùs tutelam sic posteriorem arripuit, ita literas ac earum studiosos colere omnes, ita fouere, ita augere & honestare perrexit, vt ad rem natus aliam nullam, nec alio fine tantas opes, tantamq; gloriam consecutus, præproperâ celi benignitate trahentis, videretur. Nam, vt omittā alibi alia cōmunis eius præsidij plurima & maxima monumēta, quid aliud Romanam omnem Academiam, atq; istas adèò Sapientiæ nobilissimas

scholas esse dicā, quid hanc quotidianam discipulorum atq; frequētissimam vndiquē confluentium celebritatē, quid doctorū & præsidum, hominum clarissimorum, assiduitatem & vigilantia, nisi fontē veluti quen-
dam ac seminariū perennis eiusdem beneficij, speculum bonæ mentis, amoris reliquias, pignus voluntatis, splendoris imaginem, præsentia notam minimè defutura?

Quamobrē nouissima connectā cum primis aliquādō. Non tumulū ego istum Leonis credam vnquā funalibus circumseptū: faceffat dolor, si quis adest: sed lucentem Pharum censeo; & hoc proiectu luminis ad tranquillitatem bonarum artium iuuentutem omni ex parte cōuocandā. Præclarum meherclè, bonum esse, doctum esse; præclarissimum, alios facere, cū ipse fueris. Vterque fuit Leo, & vtumq; fecit. Vt hæc vna, si cæteræ laudandi causæ in illo deficient, abundè exornatū infinitæ seculorū posteritati commendet. Hæc vna certè merito perficit suo, vt naturæ gratias agamus, quæ talem genuit, in virtute lætemur, quæ Pontificem fecit, ætati vel superiori, vel nostræ gratulemur, cui tanto bono perfrui licuit,
cœlo

cœlo demùm inuideamus, quod illum iusto citiùs è terris auocauit. Vix enim aliquot paucos menses supra octauum annum in Pontificatu vixerat, qui nunquàm mori debuiffe videbatur. Sed quid ago? abrepti cogitatione reuoluo eòdem, tanquàm ad mortuum.

Non obijsti, abijsti, magnanime Leo: non exuisti vitam, mutauisti, sanctissime Pontifex: non decessisti, parens noster custosq; optime, tantùm recessisti: clientũ precibus tuorũ, quoties te cunq; sollicitauerint, seũ ad vsum, siuè ad auxiliũ semper ad futurum. Viuis etiamnũ, viuesq; perpetuò in pulcherrimis operibus tuis, in animis & cordibus nostris, in oculis posterorum, in securitate æternitatis, quoad hominũ genus erit, vsquedũ stabit Capitoliũ, quamdiũ pretium literis, honos sapientiæ habebitur, postremò quantum coæuæ Superis durabit nomen beneficentiæ.

Nos interim, Auditores, de tanto Heröe statuamus, quod Indorũ Brachmanes philosophabãtur olim, vitam istam esse veluti conceptorum in vtero statum, mortem autem partum ad veram vitam. Quam sen-

ten-

tentiam exemplo suo dux inter Thebanos fortissimus egregiè sanè confirmavit illis verbis; Non finis, commilitones, vitæ meæ, sed melius & altius initium aduenit. Nunc enim vester Epaminondas nascitur, quia sic moritur. Fuisse Leonem hæreat nobis in animo potiùs, quàm non esse. Patronum agnoscamus inter Cœlites, fruamur hîc eius beneficijs: cogitemus ipsum nequè ademptum suis, nequè orbi quamuis iuuenem citò præreptum, qui spatium perficiendi id, quod benè cogitauerat, habuit; nec vocari posse breue tempus, quod totum est in perpetratione rerum maximarum gloriosè consummatum. Vt repugnet natura, doloriq; humaniter indulgeat suo pro iactura & desiderio charissimi Principis; recreemur tamen hoc tempore præsertim, & putemus Philippi nos fomento Macedonis ab eo demulceri, tanquàm singulos desupèr sic affatus consoletur; Non absum, nec abero, quia pro me habebitis ALEXANDRVM.

D I X I.

BER-



BERNARDINO CARD: SPADÆ
 EPISCOPO PRAENESTINO,

Domino suo clementissimo ,

*omnium honestarum Artium exem-
 plo , ac praesidio singulari ,*

IAC: ALB: GHIBBESIVS, S. P. D.



IBIVM ingenuæ quen-
 dam stirpis (vt de Publi-
 cio taceam, itidẽm similli-
 mo, nè Homerici Glauci
 merear notam, qui ab æ-
 reis aurea minimè discer-
 nebat) Magno Pompeio fuisse persimilem;
 regiquè Antiocho, Hieracis patri, vnũ ex
 proceribus, regij & ipsum sanguinis, nomi-
 ne Artemona, vultu, incessu, toto habitu
 deniquè corporis geminum loquuntur hi-
 storix, sic, vt permutata conditione, & hi
 in illis, & illi rursùm salutarì in his facil-
 limè

limè possent. Res omninò ardua est ad distinguendum parspecies, sed tamen gratus error: hocquè iucundior spectantibus audientibusuè, si naturæ quoquè eximiæ nitentis ad virtutem, fortunæquè adeò meritæ præclaris conatibus interuenientis æqualitas accesserit. Quòd si pateat adhuc longius, curratquè perfamilias inter se comparatas, tùm is demùm oritur Platonis amor, atquè hominum, qui vbiquè sunt, dignissima admiratio.

Tale siquidem additum tali facere ipsum magis tale, tanquàm effatum è tripode, sumunt philosophi pro concessio. Ac medio fanè in genere summi illi duces Coriolanus & Themistocles, licèt loco & tempore disiunctissimi, peribentur (vt cum Plinio loquar) paralleli. Rationis exemplum verò vniuersæ haud scio àn aliud ex omni ætatum memoria suppetat tam propinquum, vt Tu, *Patrone mi*, BERNARDINE SPADA, *Cardinalis amplissime*, cum LEONE MEDICEO, istius Decimo nominis, Pontifice Maximo, quà oris & corporis dignitate, quà insitè indolis æmulatione morumquè laude perfectorum, quà

vitæ

vitæ curriculo propè totius, & magnarum rerum illustri specimine conflas.

Quæ causa profectò mihi fuit, vt Leoni nupèr parentandi gratiâ laudationem promore nostræ Academiæ quotannis instituto scribens, quasi laudes concepissem tuas, de te semper cogitarem, tequè veluti propositum intuerer atquè exprimerem; eamquè tibi qualemcunquè ab exilitate ingenij mei profectam orationem indè vsquè dedicarem. Cùm enim oculos in personæ illam tuæ formam, atquè augustam speciem conuerto, proceritatem, aptitudinem, elegantiam, maiestatem; multoque magis animum, vbi penitus tuum intropexi, raras dotes contemplans diuinæ cuiusdam virtutis indices, iudicium, sapientiam, doctrinam, doctrinæ patrocini-um, clementiam, vnoquè verbo, quo ego Leonem complecti totum soleo, magnanimitatem; tum omninò temperare mihi nequeo, quin Plautinum illud seriò inclamem non sine stupore maximo,

Ego hominem homini similiorem nunquam vidi alterum:

Nequè aqua aqua, nequè lacte est lacti, crede


de mihi, vsquàm similis,

Quàm hic tui est, tuquè huius.

Te igitur offero tibi, EMINENTISSIME PRINCEPS, vt sibi quemque proximum, ità ferè acceptissimum atquè charissimum. Hoc speculum, cui cuiusmodi tandem est, certè percussum aliquem eius otij, quo per te fruor, tanquàm donum, immortale literarium, appendo ad columnam atrij tui; vtinam signum Phidiæ, simul aspectum & probatum! Tu id tamen, pro singulari tua erga liberalia studia voluntate, libens volensquè accipies, animi mei, & virtutis testimonium tuæ. Æternum fortassè non erit, pono nihilominus vt futurum. VALE.

Ex Musæo meo in ædibus tuis. Romæ;
a. d. VI. Kal. Martias. ∞. Idc. LIX.





SFORTIAE PALLAVICINO,

S. R. E.

Cardinali amplissimo,

literarum bonarum omnium compoti,
& patrono,

IACOBVS ALBANVS GHIBBESIVS

S. P. D.



A V D A R A M his diebus
Heröa Mediceum, SFOR-
TIA PALLAVICINE, *præ-*
stantissime Cardinalis, florem
illum delibatum Pontifi-
cum Maximorum, Leonem

Decimum. Atque ità laudàram, vt, cùm
humane virtutis numeros explèssset omnes,
eum etiam animalium regis, à quo mu-
tuatus erat nomen, non re solùm æmulari
præcipuas dotes, sed etiam longè multùm-
que superare ostenderim. Quam quidem
orationem intra scholarum parietes Urbis
toti-

totius celebritate habitam , in Solem & puluerem mihi (quod dicitur) orbis vniuersi proferre cupienti , pro meâ perpetuâ consuetudine dedicandi res similes patrocinio & meritis alicuius præclari viri , eâ ipsâ in ratione, quoâd eius fieri posset, proximè conuenientis , Tu solus occurrebas , cui tantum honorem, vel meum committerem , vel haberem tuum .

Ecquis enim Pontifici propior, quàm è Sacro Collegio Purpuratus? hominum doctrinâ pollentium fautori , quàm omnis literaturæ gurgis , & signifer ? Leoni deniquè, cuius asciuit, Ioânes alioqui Medices, generosâ appellationē, quàm ex tot retrò seculis natiua Pallauicinæ familiæ atquè gentilitia , nihilò syluarû & quadrupedû ranno inferior , aëris Aquila & volucrum imperatrix ? Hic omninò locus foret opportunus vtriusque prærogatiuas inter se committendi . Facerem vtiquè, nisi breuitas epistolæ dissuaderet , vt quâ Medices triplici proprietate Leonis summam in homines potestatem fuisset consecutus, tot ac tantis ex Aquilæ naturâ, vel etiam pluribus desumptis priuilegijs , tu Pallauicinus

æqualis imperij dignissimus esse censere-
 ris. Satis ostendit ALEXANDER commu-
 ne iudicium, diuinæ sapientiæ Pontifex,
 dum fugientem honores, quos iam reli-
 queras amplissimos, recusantemque glo-
 riam, quæ tamen semper, tanquam umbra
 virtutis, te sequi volebat, è priuata cellâ
 protractum nuper in curiæ luce, pullaque
 indutum veste Diui Ignatij sectatorem, in
 togæ splendore conchyliatæ, Patrum Con-
 scriptorum sodalem, atque adeò fratrem
 suum, non sine ingenti omnium ordinum,
 ætatum, generum lætitiâ & gratulatione,
 iussit eminere. Et verò maxima tua & im-
 mortalia in Sanctam Sedem studia atque
 merita, nominatim recentes Vindicie
 Concilij Tridentini iamdiu expectatæ, sic
 à te celeriter contextæ, tanto applausu
 gentium, quæ ubique sunt, lectæ & rece-
 ptæ, prouocauerunt ad remunerandum
 quam simillimo munere non inuitum.

Lupum in oratione Leonis vocauit Lu-
 therum: pari ratione naturalis odij, quod
 est aquilæ cum serpente, conuiciatorem
 illum *Suauem*, Cynæo melle virosiorem,
 iustissimè licebit, opinor, appellare draco-

nem. At serperastrorum soboli seu lippæ, seu cœcutienti remedium, quæ est reginæ Auis charitas, si consanescere volet, ab ipsius felle promptum exhibetur. Id enim ad quamvis caliginem oculorum prodesse illitū docuere medici magni nominis. Atquæ hoc ab atramento voluminum tuorum, amaro quidē illo, sed salubri, uti res iam cœpit ire, cumulatè sperare decet.

Sed vel merâ veritate, quâ de te ipso testam velles, certè non laudatam, nimis offendo modestiam tuam: ad me reuertar, & reddam hac reliquâ parte causam dedicationis meæ. Quæ profectò, cur tibi potissimum exilis ingenij qualemcunque partem inscriberem, non una extitit. Multæ me ad id, & necessaria rationes impulerunt. Illa communis primùm, debiti repræsentatio, quo me sodalitas doctissimorum hominum (quos ab excellenti pietatis expressione vocant *Iesuitas*) à puero deinctum tenet, propter eruditionem literarum (nam in his *Quòd placeo, si placeo*, ut cum Horatio loquar, *eius est*) ut apud te, totius thesauri veluti Quæstorè, cum professione gratiæ ex aliquâ parte deponeretur. Tum

excitavit altera rei tuę domesticę propior,
quod ante viginti annos Londini, quò ve-
nerat Catholici Regis de rebus grauissi-
mis extra ordinem missus cum Veladæ
dynastâ Legatus, ob recentem vsum fami-
liaritatis cum eo mihi in Hispaniâ contra-
ctum, potui summâ felicitate meâ Virgi-
lio Maluetio, avunculo tuo, clarissimo viro,
navare totis decem mensibus operam in-
terpretis. Neque verò, quod ago iàm hîc
Romæ, minimum præbet argumentum.
Siquidem Bernardino Cardinali Spadæ,
domino meo, ità vis cupisque, pro eius
eximiâ suauitate morum, ac studiorum si-
militudine, vt alteri tibi.

Deniquè, vt in vnum concludam omnia,
causa præcipua & peculiaris, constans tua
& perspecta in me amando voluntas, æsti-
mandoquè tricas meas, debet esse. Quid
enim non exaggerâsti pluribus verbis, cum
proximè salutandi gratiâ te adirem? illud
prætereà secretò dictum mihi, quod in si-
nu teneo & foueo, nè per rimam vsquàm
effluat, Deus bone! quantos animos adie-
cit? Quamobrèm habebis, EMINENTIS-
SIME PRINCEPS, hunc à me vicissim
hono-

honorem & cultum hac qualicunque nominis tui commendatione persolutum: neque tam, quid Amplitudini tuæ conveniat, quàm quid præstari ab homine possit curæ suppellectilis, expendes. VALE.

ROMÆ, è Musæo nostro, 16. Kal. Mart. MDCLX.

FINIS.



ALIQVOT ERRATA CORRIGENDA.

P Ag. 26. vers. 14. *Grecaquæ*: Græcaquæ. 66. v. 22. *prefectò*: profectò. ibid. v. 26. *cnm*: cum. 77. v. 17. *Copitoly*: Capitolij. 85. v. 12. *studio*: stadio. 86. v. 19. *utumq;*: utrumq;. 87. v. 21. *beneficientiæ*: beneficentiæ. 90. v. 17. *peribentur*: perhibentur. 94. v. 18. *ranno*: tyranno.









